

## 辨太陽病脉證并治上

- 1· 太陽之為病，脉浮、頭項強痛而惡寒。
- 2· 太陽病，發熱、汗出、惡風、脉緩者，名為中風。
- 3· 太陽病，或已發熱，或未發熱，必惡寒、體痛、嘔逆、脉陰陽俱緊者，名為傷寒。
- 4· 傷寒一日，太陽受之。脉若靜者，為不傳；頗欲吐，若躁煩，脉數急者，為傳也。
- 5· 傷寒二三日，陽明、少陽證不見者，為不傳也。
- 6· 太陽病，發熱而渴，不惡寒者，為溫病。若發汗已，身灼熱者，名風溫。風溫為病，脉陰陽俱浮、自汗出、身重、多眠睡、鼻息必鼾、語言難出；若被下者，小便不利、直視失溲；若被火者，微發黃色，劇則如驚癇，時痲[癩]痲；若火熏之，一逆尚引日，再逆促命期。
- 7· 病有發熱惡寒者；發于陽也；無熱惡寒者，發于陰也。發于陽，七日愈；發于陰，六日愈。以陽數七、陰數六故也。
- 8· 太陽病，頭痛至七日以上自愈者，以行其經盡故也。若欲作再經者，針足陽明，使經不傳則愈。
- 9· 太陽病欲解時，從巳至未上。
- 10· 風家，表解而不了了者，十二日愈。
- 11· 病人身大熱，反欲得衣者，熱在皮膚，寒在骨髓也；身大寒，反不欲近衣者，寒在皮膚，熱在骨髓也。
- 12· 太陽中風，陽浮而陰弱，陽浮者，熱自發；陰弱者，汗自出。嗇嗇惡寒，淅淅惡風，翕翕發熱，鼻鳴乾嘔者，桂枝湯主之。方一。

桂枝三兩（去皮） 芍藥（三兩） 甘草二兩（炙） 生薑三兩（切） 大棗十二枚（擘）

上五味， 咀三味，以水七升，微火煮取三升，去滓，適寒溫，服一升。服已須臾，歠[啜]熱稀粥一升餘，以助藥力，溫覆令一時許，遍身漉漉微似有汗者益佳；不可令如水流離，病必不除。若一服汗出病差，停後服，不必盡劑；若不汗，更服依前法；又不汗，後服小促其間，半日許令三服盡。若病重者，一日一夜服，周時觀之，服一劑盡，病證猶在者，更作服；若汗不出，乃服至二、

三劑。禁生冷、粘滑、肉麵、五辛、酒酪、臭惡等物。

13· 太陽病，頭痛、發熱、汗出、惡風，桂枝湯主之。方二。(用前第一方。)

14· 太陽病，項背強几几，反汗出惡風者，桂枝加葛根湯主之。方三。

葛根四兩 麻黃三兩(去節) 芍藥二兩 生薑三兩(切) 甘草二兩(炙) 大棗十二枚(擘) 桂枝二兩(去皮)

上七味；以水一斗，先煮麻黃、葛根，減二升，去上沫，內諸藥，煮取三升，去滓，溫服一升。覆取微似汗，不須啜粥，餘如桂枝法將息及禁忌。(臣億等謹按仲景本論，太陽中風自汗用桂枝，傷寒無汗用麻黃，今證云汗出惡風，而方中有麻黃，恐非本意也。第三卷有葛根湯證云，無汗惡風，正與此方同，是合用麻黃也。此云桂枝加葛根湯，恐是桂枝中但加葛根耳。)

15· 太陽病，下之後，其氣上衝者，可與桂枝湯，方用前法；若不上衝者，不得與之。[方]四。

16· 太陽病三日，已發汗，若吐、若下、若溫針，仍不解者，此為壞病，桂枝不中與之也。觀其脉證，知犯何逆，隨證治之。桂枝本為解肌，若其人脉浮緊、發熱汗不出者，不可與之也。常須識此，勿令誤也。[方]五。

17· 若酒客病，不可與桂枝湯，得之則嘔，以酒客不喜甘故也。

18· 喘家作桂枝湯，加厚朴、杏子佳。[方]六。

19· 凡服桂枝湯吐者，其後必吐膿血也。

20· 太陽病，發汗，遂漏不止，其人惡風，小便難，四肢微急，難以屈伸者，桂枝加附子湯主之。方七。

桂枝三兩(去皮) 芍藥(三兩) 甘草三兩(炙) 生薑三兩(切) 大棗十二枚(擘)  
附子一枚(炮，去皮，破八片)

上六味，以水七升，煮取三升，去滓，溫服一升。本云桂枝湯，今加附子，將息如前法。

21· 太陽病，下之後，脉促、胃滿者，桂枝去芍藥湯主之。方八。(促，一作縱。)

桂枝三兩(去皮) 甘草二兩(炙) 生薑三兩(切) 大棗十二枚(擘)

上四味，以水七升，煮取三升，去滓，溫服一升。本云桂枝湯，今去芍藥，將息如前法。

22·若微寒者，桂枝去芍藥加附子湯主之。方九。

桂枝三兩（去皮） 甘草二兩（炙） 生薑三兩（切） 大棗十二枚（擘） 附子一枚（炮，去皮，破八片，）

五味，以水七升，煮取三升，去滓，溫服一升。本云桂枝湯，今去芍藥，加附子，將息如前法。

23·太陽病，得之八九日，如瘧狀，發熱惡寒，熱多寒少，其人不嘔，清便欲自可，一日二三度發。脉微緩者，為欲愈也；脉微而惡寒者，此陰陽俱虛，不可更發汗、更下、更吐也；面色反有熱色者，未欲解也，以其不能得小汗出，身必痒[癢]，宜桂枝麻黃各半湯。方十。

桂枝一兩十六銖（去皮） 芍藥 生薑（切） 甘草（炙） 麻黃各一兩（去節） 大棗四枚（擘） 杏仁二十四枚（湯浸去皮尖及兩仁者）

上七味，以水五升，先煮麻黃一二沸，去上沫。內諸藥，煮取一升八合，去滓，溫服六合，本云桂枝湯三合，麻黃湯三合，併為六合，頓服，將息如上法。（臣億等謹按桂枝湯方，桂枝、芍藥、生薑各三兩，甘草二兩，大棗十二枚。麻黃湯方，麻黃三兩，桂枝二兩，甘草一兩，杏仁七十箇。今以演算法約之，二湯各取三分之一，即得桂枝一兩十六銖，芍藥、生薑、甘草各一兩，大棗四枚，杏仁二十三箇零三分枚之一，收之得二十四箇，合方，詳此方乃三分之一，非各半也，宜云合半湯。）

24·太陽病，初服桂枝湯，反煩，不解者，先刺風池、風府，却與桂枝湯則愈。[方]十一。（用前第一方。）

25·服桂枝湯，大汗出，脉洪大者，與桂枝湯，如前法。若形似瘧，一日再發者，汗出必解，宜桂枝二麻黃一湯。方十二。

桂枝一兩十七銖（去皮） 芍藥一兩六銖 麻黃十六銖（去節） 生薑一兩六銖（切）  
杏仁十六箇（去皮尖） 甘草一兩二銖（炙） 大棗五枚（擘）

上七味，以水五升，先煮麻黃一二沸，去上沫，內諸藥，煮取二升，去滓，溫服一升，日再服。本云桂枝湯二分、麻黃湯一分，合為二升，分再服。今合為一方，將息如前法。

（臣億等謹按桂枝湯方，桂枝、芍藥、生薑各三兩，甘草二兩，大棗十二枚。麻黃湯方，麻黃三兩，桂枝二兩，甘草一兩，杏仁七十箇。今以算法約之：桂枝湯取十二分之五，即得桂枝、芍藥、生薑各一兩六銖，甘草二十銖，大棗五枚；麻黃湯取九分之二，即得麻黃十六銖，桂枝十銖三分銖之二，收之得十一銖，甘草五銖三分銖之一，收之得六銖，杏仁十五箇九分枚之四，收之得十六箇。二湯所取相合，即共得桂枝一兩十七銖，麻黃十六銖，生薑芍藥各一兩六銖，甘草一兩二銖，大棗五枚，杏仁十六箇，合方。）

26·服桂枝湯，大汗出後，大煩渴不解，脈洪大者，白虎加人參湯主之。方十三。

知母六兩 石膏一斤（碎，綿裹） 甘草（炙）二兩 粳米六合 人參三兩

上五味，以水一斗，粳米熟，湯成去滓，溫服一升，日三服。

27·太陽病，發熱惡寒，熱多寒少，脈微弱者，此無陽也。不可發汗，宜桂枝二越婢一湯。方十四。

桂枝（去皮） 芍藥 麻黃 甘草各十八銖（炙） 大棗四枚（擘） 生薑一兩二銖

（切） 石膏二十四銖（碎，綿裹）

上七味，以水五升，煮麻黃一二沸，去上沫，內諸藥，煮取二升，去滓，溫服一升。本云：當裁為越婢湯、桂枝湯，合之飲一升；今合為一方，桂枝湯二分、越婢湯一分。（臣億等謹按桂枝湯方：桂枝、芍藥、生薑各三兩，甘草二兩，大棗十二枚。越婢湯方：麻黃二兩，生薑三兩，甘草二兩，石膏半斤，大棗十五枚。今以算法約之：桂枝湯取四分之一，即得桂枝、芍藥、生薑各十八銖，甘草十二銖，大棗三枚；越婢湯取八分之一，即得麻黃十八銖、生薑九銖、甘草六銖、石膏二十四銖，大棗一枚八分之七，棄之。二湯所取相合，即共得桂枝、芍藥、甘草、麻黃各十八銖，生薑一兩三銖，石膏二十四銖，大棗四枚，合方。舊云：桂枝三，今取四分之一，即當云桂枝二也。越婢湯方，見仲景雜方中。《外臺秘要》：一云起脾湯。）

28·服桂枝湯，或下之，仍頭項強痛、翕翕發熱、無汗、心下滿微痛、小便不利者，桂枝去桂加茯苓白朮湯主之。方十五。

芍藥（三兩） 甘草二兩（炙） 生薑（切） 白朮 茯苓各三兩 大棗十二枚（擘）

上六味，以水八升，煮取三升，去滓，溫服一升，小便利則愈。本云桂枝湯，今去桂枝，加茯苓白朮。

29·傷寒脉浮、自汗出、小便數、心煩、微惡寒、腳攣急，反與桂枝，欲攻其表，此誤也。得之便厥、咽中乾、煩躁吐逆者，作甘草乾薑湯與之，以復其陽。若厥愈足溫者，更作芍藥甘草湯與之，其腳即伸；若胃氣不和讞語者，少與調胃承氣湯；若重發汗，復加燒針者，四逆湯主之。方十六。

甘草乾薑湯方：

甘草四兩（炙） 乾薑二兩

上二味，以水三升，煮取一升五合，去滓，分溫再服。

芍藥甘草湯方：

白芍藥 甘草各四兩（炙）

上二味，以水三升，煮取一升五合，去滓，分溫再服。

調胃承氣湯方：

大黃四兩（去皮，清酒洗） 甘草二兩（炙） 芒消（半升）

上三味，以水三升，煮取一升，去滓，內芒消，更上火微煮令沸，少少溫服之。

四逆湯方：

甘草二兩（炙） 乾薑一兩半 附子一枚（生用，去皮，破八片）

上三味，以水三升，煮取一升二合，去滓，分溫再服。強人可大附子一枚、乾薑三兩。

30·問曰：證象陽旦，按法治之而增劇，厥逆、咽中乾、兩脛拘急而讞語。師曰：言夜半手足當溫，兩腳當伸。後如師言，何以知此？答曰：寸口脉浮而大；浮為風，大為虛，風則生微熱，虛則兩脛攣。病形象桂枝，因加附子參其間，增桂令汗出，附子溫經，亡陽故也。厥逆、咽中乾、煩躁、陽明內結、讞語煩亂，更飲甘草乾薑湯，夜半陽氣還，兩足當熱，脛尚微拘急，重與芍藥甘草湯，爾乃脛伸；以承氣湯微瀉，則止其讞語。故知病可愈。

辨太陽病脉證并治中

31· 太陽病，項背強几几、無汗、惡風，葛根湯主之。方一。

葛根四兩 麻黃三兩（去節） 桂枝二兩（去皮） 生薑三兩（切） 甘草二兩（炙）  
芍藥二兩 大棗十二枚（擘）

上七味，以水一斗，先煮麻黃、葛根，減二升，去白沫，內諸藥，煮取三升，去滓，溫服一升，覆取微似汗。餘如桂枝法將息及禁忌，諸湯皆倣[仿]此。

32· 太陽與陽明合病者，必自下利，葛根湯主之。方二。（用前第一方，一云用後第四方。）

33· 太陽與陽明合病，不下利，但嘔者，葛根加半夏湯主之。方三。

葛根四兩 麻黃三兩（去節） 甘草二兩（炙） 芍藥（二兩） 桂枝二兩（去皮） 生薑  
二兩（切） 半夏半升（洗） 大棗十二枚（擘）

上八味，以水一斗，先煮葛根、麻黃，減二升。去白沫，內諸藥，煮取三升，去滓，溫服一升。覆取微似汗。

34· 太陽病，桂枝證，醫反下之，利遂不止，脉促者，表未解也；喘而汗出者，葛根黃芩黃連湯主之。方四。（促，一作縱）

葛根半斤 甘草二兩（炙） 黃芩三兩 黃連三兩

上四味，以水八升，先煮葛根，減二升，內諸藥，煮取二升，去滓，分溫再服。

35· 太陽病，頭痛、發熱、身疼、腰痛、骨節疼痛、惡風、無汗而喘者，麻黃湯主之。方五。

麻黃三兩（去節） 桂枝二兩（去皮） 甘草一兩（炙） 杏仁七十箇（去皮尖）

上四味，以水九升，先煮麻黃，減二升，去上沫，內諸藥，煮取二升半，去滓，溫服八合，覆取微似汗，不須啜粥，餘如桂枝法將息。

36· 太陽與陽明合病，喘而胃滿者，不可下，宜麻黃湯。方六。（用前第五方。）

37· 太陽病，十日以去，脉浮細而嗜臥者，外已解也。設胃滿脅痛者，與小柴胡湯；脉但浮者，與麻黃湯。方七。（用前第五方。）

小柴胡湯方：

柴胡半斤 黃芩 人參 甘草（炙） 生薑各三兩（切） 大棗十二枚（擘） 半夏半升（洗）

上七味，以水一斗二升，煮取六升，去滓，再煎取三升，溫服一升，日三服。

38·太陽中風，脈浮緊、發熱、惡寒、身疼痛、不汗出而煩躁者，大青龍湯主之；若脈微弱，汗出惡風者，不可服之。服之則厥逆、筋惕肉瞤，此為逆也。大青龍湯方。[方]八。

麻黃六兩（去節） 桂枝二兩（去皮） 甘草二兩（炙） 杏仁四十枚（去皮尖） 生薑三兩（切） 大棗十枚（擘） 石膏如雞子大（碎）

上七味，以水九升，先煮麻黃，減二升，去上沫，內諸藥，煮取三升，去滓，溫服一升，取微似汗。汗出多者，溫粉粉之。一服汗者，停後服；若復服，汗多亡陽，遂（一作逆）虛，惡風、煩躁、不得眠也。

39·傷寒，脈浮緩，身不疼，但重，乍有輕時，無少陰證者，大青龍湯發之。方九。（用前第八方。）

40·傷寒，表不解，心下有水氣，乾嘔、發熱而欬，或渴，或利，或噎，或小便不利、少腹滿，或喘者，小青龍湯主之。方十。

麻黃（去節） 芍藥 細辛 乾薑 甘草（炙） 桂枝各三兩（去皮） 五味子半升 半夏半升（洗）

上八味，以水一斗，先煮麻黃，減二升，去上沫，內諸藥。煮取三升，去滓，溫服一升。若渴，去半夏，加栝樓[樓]根三兩；若微利，去麻黃，加薤花，如一雞子，熬令赤色；若噎者，去麻黃，加附子一枚，炮；若小便不利、少腹滿者，去麻黃，加茯苓四兩；若喘，去麻黃，加杏仁半升，去皮尖。且薤花不治利。麻黃主喘，今此語反之，疑非仲景意。

（臣億等謹按小青龍湯，大要治水。又按本草，薤花下十二水。若水去，利則止也。又按千金，形腫者，應內麻黃。乃內杏仁者，以麻黃發其陽故也。以此證之，豈非仲景意也。）

41·傷寒，心下有水氣，欬而微喘、發熱不渴。服湯已，渴者，此寒去欲解也，小青龍湯主之。[方]

十一。(用前第十方。)

42·太陽病，外證未解，脉浮弱者，當以汗解，宜桂枝湯。方十二。

桂枝（去皮） 芍藥 生薑各三兩（切） 甘草二兩（炙） 大棗十二枚（擘）

上五味，以水七升，煮取三升，去滓，溫服一升。須臾啜熱稀粥一升，助藥力，取微汗。

43·太陽病，下之微喘者，表未解故也，桂枝加厚朴杏子湯主之。方十三。

桂枝三兩（去皮） 甘草二兩（炙） 生薑三兩（切） 芍藥三兩 大棗十二枚（擘）

厚朴二兩（炙，去皮） 杏仁五十枚（去皮尖）

上七味，以水七升，微火煮取三升，去滓，溫服一升，覆取微似汗。

44·太陽病，外證未解，不可下也，下之為逆；欲解外者，宜桂枝湯。方十四。(用前第十二方。)

45·太陽病，先發汗不解，而復下之，脉浮者不愈。浮為在外，而反下之，故令不愈。今脉浮，故在外，當須解外則愈，宜桂枝湯。方十五。(用前第十二方。)

46·太陽病，脉浮緊、無汗、發熱、身疼痛，八九日不解，表證仍在，此當發其汗。服藥已微除，其人發煩，目瞑，劇者必衄，衄乃解。所以然者，陽氣重故也。麻黃湯主之。[方]十六。(用前第五方。)

47·太陽病，脉浮緊，發熱，身無汗，自衄者愈。

48·二陽併病，太陽初得病時，發其汗，汗先出不徹，因轉屬陽明，續自微汗出，不惡寒。若太陽病證不罷者，不可下，下之為逆；如此可小發汗。設面色緣緣正赤者，陽氣怫鬱在表，當解之熏之；若發汗不徹，不足言，陽氣怫鬱不得越，當汗不汗，其人躁煩，不知痛處，乍在腹中，乍在四肢，按之不可得，其人短氣但坐，以汗出不徹故也，更發汗則愈。何以知汗出不徹？以脉濇故知也。

49·脉浮數者，法當汗出而愈。若下之，身重、心悸者，不可發汗，當自汗出乃解。所以然者，尺中脉微，此裏虛。須表裏實，津液自和，便自汗出愈。

50·脉浮緊者，法當身疼痛，宜以汗解之；假令尺中遲者，不可發汗。何以知然？以榮氣不足，血少故也。

- 51·脉浮者，病在表，可發汗，宜麻黃湯。[方]十七。(用前第五方，法用桂枝湯。)
- 52·脉浮而數者，可發汗，宜麻黃湯。[方]十八。(用前第五方。)
- 53·病常自汗出者，此為榮氣和。榮氣和者，外不諧，以衛氣不共榮氣諧和故爾。以榮行脉中，衛行脉外。復發其汗，榮衛和則愈。宜桂枝湯。[方]十九。(用前第十二方。)
- 54·病人藏無他病，時發熱、自汗出而不愈者，此衛氣不和也。先其時發汗則愈，宜桂枝湯。[方]二十。(用前第十二方。)
- 55·傷寒脉浮緊，不發汗，因致衄者，麻黃湯主之。[方]二十一。(用前第五方。)
- 56·傷寒不大便六七日，頭痛有熱者，與承氣湯；其小便清（一云大便青）者，知不在裏，仍在表也，當須發汗；若頭痛者必衄。宜桂枝湯。[方]二十二。(用前第十二方。)
- 57·傷寒發汗已解，半日許復煩，脉浮數者，可更發汗，宜桂枝湯。[方]二十三。(用前第十二方。)
- 58·凡病，若發汗，若吐，若下，若亡血，亡津液。陰陽自和者，必自愈。
- 59·大下之後，復發汗，小便不利者，亡津液也。勿治之，得小便利，必自愈。
- 60·下之後，復發汗，必振寒、脉微細。所以然者，以內外俱虛故也。
- 61·下之後，復發汗，晝日煩躁不得眠，夜而安靜，不嘔、不渴，無表證，脉沈微，身無大熱者，乾薑附子湯主之。方二十四。

乾薑一兩 附子一枚（生用，去皮，切八片）

上二味，以水三升，煮取一升，去滓，頓服。

- 62·發汗後，身疼痛，脉沈遲者，桂枝加芍藥生薑各一兩人參三兩新加湯主之。方二十五。

桂枝三兩（去皮） 芍藥四兩 甘草二兩（炙） 人參三兩 大棗十二枚（擘） 生薑四兩

上六味，以水一斗二升，煮取三升，去滓，溫服一升。本云桂枝湯，今加芍藥生薑人參。

- 63·發汗後，不可更行桂枝湯。汗出而喘，無大熱者，可與麻黃杏仁甘草石膏湯。方二十六。

麻黃四兩（去節） 杏仁五十箇（去皮尖） 甘草二兩（炙） 石膏半斤（碎，綿裹）

上四味，以水七升，煮麻黃，減二升，去上沫，內諸藥，煮取二升，去滓，溫服一升。本云黃

耳聾。

64·發汗過多，其人叉手自冒心，心下悸欲得按者，桂枝甘草湯主之。方二十七。

桂枝四兩（去皮） 甘草二兩（炙）

上二味，以水三升，煮取一升，去滓，頓服。

65·發汗後，其人臍下悸者，欲作奔豚，茯苓桂枝甘草大棗湯主之。方二十八。

茯苓半斤 桂枝四兩（去皮） 甘草二兩（炙） 大棗十五枚（擘）

上四味，以甘瀾水一斗，先煮茯苓，減二升，內諸藥，煮取三升，去滓，溫服一升，日三服。

作甘瀾水法：取水二斗，置大盆內，以勺揚之，水上有珠子五六千顆相逐，取用之。

66·發汗後，腹脹滿者，厚朴生薑半夏甘草人參湯主之。方二十九。

厚朴半斤（炙，去皮） 生薑半斤（切） 半夏半升（洗） 甘草二兩 人參一兩

上五味，以水一斗，煮取三升，去滓，溫服一升，日三服。

67·傷寒，若吐、若下後，心下逆滿、氣上衝膈、起則頭眩、脈沈緊，發汗則動經，身為振振搖者，茯苓桂枝白朮甘草湯主之。方三十。

茯苓四兩 桂枝三兩（去皮） 白朮 甘草各二兩（炙）

上四味，以水六升，煮取三升，去滓，分溫三服。

68·發汗病不解，反惡寒者，虛故也，芍藥甘草附子湯主之。方三十一。

芍藥 甘草各三兩（炙） 附子一枚（炮，去皮，破八片）

上三味，以水五升，煮取一升五合，去滓，分溫三服。疑非仲景方。

69·發汗，若下之，病仍不解，煩躁者，茯苓四逆湯主之。方三十二。

茯苓四兩 人參一兩 附子一枚（生用，去皮，破八片） 甘草二兩（炙） 乾薑一兩半

上五味，以水五升，煮取三升，去滓，溫服七合，日二服。

70·發汗後，惡寒者，虛故也；不惡寒，但熱者，實也，當和胃氣，與調胃承氣湯。方三十三。（玉函云：與小承氣湯。）

芒消半升 甘草二兩（炙） 大黃四兩（去皮，清酒洗）

上三味，以水三升，煮取一升，去滓，內芒消，更煮兩沸，頓服。

71·太陽病，發汗後，大汗出、胃中乾、煩躁不得眠，欲得飲水者，少少與飲之，令胃氣和則愈；若脉浮、小便不利、微熱、消渴者，五苓散主之。方三十四。（即豬苓散是。）

豬苓十八銖（去皮） 澤瀉一兩六銖 白朮十八銖 茯苓十八銖 桂枝半兩（去皮）

上五味，搗為散，以白飲和服方寸匕，日三服。多飲煖水，汗出愈，如法將息。

72·發汗已，脉浮數、煩渴者，五苓散主之。[方]三十五。（用前第三十四方。）

73·傷寒，汗出而渴者，五苓散主之；不渴者，茯苓甘草湯主之。方三十六。

茯苓二兩 桂枝二兩（去皮） 甘草一兩（炙） 生薑三兩（切）

上四味，以水四升，煮取二升，去滓，分溫三服。

74·中風發熱，六七日不解而煩，有表裏證，渴欲飲水，水入則吐者，名曰水逆，五苓散主之。[方]三十七。（用前第三十四方。）

75·未持脉時，病人手叉自冒心。師因教試令欬而不效者，此必兩耳聾無聞也。所以然者，以重發汗，虛故如此。發汗後，飲水多必喘；以水灌之亦喘。

76·發汗後，水藥不得入口，為逆。若更發汗，必吐下不止。發汗、吐下後，虛煩不得眠；若劇者，必反復顛倒（音到下同），心中懊憹（上烏浩下奴冬切下同），梔子豉湯主之；若少氣者，梔子甘草豉湯主之；若嘔者，梔子生薑豉湯主之。[方]三十八。

梔子豉湯方：

梔子十四箇（擘） 香豉四合（綿裹）

上二味，以水四升，先煮梔子，得二升半，內豉，煮取一升半，去滓，分為二服，溫進一服，得吐者，止後服。

梔子甘草豉湯方：

梔子十四箇（擘） 甘草二兩（炙） 香豉四合（綿裹）

上三味，以水四升，先煮梔子、甘草，取二升半，內豉，煮取一升半，去滓，分二服。溫進一服，得吐者，止後服。

梔子生薑豉湯方：

梔子十四箇（擘） 生薑五兩 香豉四合（綿裹）

上三味，以水四升，先煮梔子、生薑，取二升半，內豉，煮取一升半，去滓，分二服。溫進一服，得吐者，止後服。

77·發汗，若下之，而煩熱胃中窒者，梔子豉湯主之。[方]三十九。（用上初方。）

78·傷寒五六日，大下之後，身熱不去，心中結痛者，未欲解也，梔子豉湯主之。[方]四十。（用上初方。）

79·傷寒下後，心煩、腹滿、臥起不安者，梔子厚朴湯主之。方四十一。

梔子十四箇（擘） 厚朴四兩（炙，去皮） 枳實四枚（水浸，炙令黃）

上三味，以水三升半，煮取一升半，去滓，分二服。溫進一服，得吐者，止後服。

80·傷寒，醫以丸藥大下之，身熱不去；微煩者，梔子乾薑湯主之。方四十二。

梔子十四箇（擘） 乾薑二兩

上二味，以水三升半，煮取一升半，去滓，分二服，溫進一服。得吐者，止後服。

81·凡用梔子湯，病人舊微溏者，不可與服之。

82·太陽病發汗，汗出不解，其人仍發熱，心下悸、頭眩、身瞤動，振振欲擗（一作僻）地者，真武湯主之。方四十三。

茯苓 芍藥 生薑各三兩（切） 白朮二兩 附子一枚（炮，去皮，破八片）

上五味，以水八升，煮取三升，去滓，溫服七合。日三服。

83·咽喉乾燥者，不可發汗。

84·淋家，不可發汗；發汗必便血。

85·瘡家，雖身疼痛，不可發汗；汗出則瘡。

86· 衄家，不可發汗；汗出必額上陷脉急緊、直視不能眴（音喚，又胡絹切，下同。一作瞬），不得眠。

87· 亡血家，不可發汗；發汗則寒慄而振。

88· 汗家，重發汗，必恍惚心亂，小便已陰疼，與禹餘糧丸。[方]四十四。（方本闕。）

89· 病人有寒，復發汗，胃中冷，必吐蚘。（一作逆。）

90· 本發汗，而復下之，此為逆也。若先發汗，治不為逆；本先下之，而反汗之，為逆；若先下之，治不為逆。

91· 傷寒，醫下之，續得下利清穀不止，身疼痛者，急當救裏；後身疼痛，清便自調者，急當救表。救裏宜四逆湯，救表宜桂枝湯。[方]四十五。（用前第十二方。）

92· 病發熱、頭痛，脉反沈，若不差，身體疼痛，當救其裏，四逆湯方。

甘草二兩（炙） 乾薑一兩半 附子一枚（生用，去皮，破八片）

上三味，以水三升，煮取一升二合，去滓，分溫再服。強人可大附子一枚、乾薑三兩。

93· 太陽病，先下而不愈，因復發汗。以此表裏俱虛，其人因致冒，冒家汗出自愈。所以然者，汗出表和故也。裏未和，然後復下之。

94· 太陽病未解，脉陰陽俱停，（一作微）必先振慄，汗出而解；但陽脉微者，先汗出而解；但陰脉微（一作尺脉實）者，下之而解。若欲下之，宜調胃承氣湯。[方]四十六。（用前第三十三方。一云，用大柴胡湯。）

95· 太陽病，發熱、汗出者，此為榮弱衛強，故使汗出。欲救邪風者，宜桂枝湯。[方]四十七。（方用前法。）

96· 傷寒五六日中風，往來寒熱，胃脅苦滿、嘿嘿不欲飲食、心煩喜嘔，或胃中煩而不嘔，或渴，或腹中痛，或脅下痞鞅，或心下悸、小便不利，或不渴、身有微熱，或欬者，小柴胡湯主之。方四十八。

柴胡半斤 黃芩三兩 人參三兩 半夏半升（洗） 甘草（炙） 生薑各三兩（切） 大棗

十二枚（擘）

上七味，以水一斗二升，煮取六升，去滓，再煎取三升，溫服一升。日三服。若胃中煩而不嘔者，去半夏人參，加栝樓實一枚；若渴，去半夏，加人參，合前成四兩半，栝樓根四兩；若腹中痛者，去黃芩，加芍藥三兩；若脅下痞鞭，去大棗，加牡蠣四兩；若心下悸，小便不利者，去黃芩，加茯苓四兩；若不渴，外有微熱者，去人參，加桂枝三兩，溫覆微汗愈；若欬者，去人參、大棗、生薑，加五味子半升、乾薑二兩。

97· 血弱、氣盡，腠理開，邪氣因入，與正氣相搏，結於脅下。正邪分爭，往來寒熱，休作有時，嘿嘿不欲飲食，藏府相連，其痛必下，邪高痛下，故使嘔也（一云藏府相違，其病必下，脅鬲[膈]中痛），小柴胡湯主之。服柴胡湯已，渴者屬陽明，以法治之。[方]四十九。（用前方。）

98· 得病六七日，脉遲浮弱、惡風寒、手足溫，醫二三下之，不能食而脅下滿痛，面目及身黃，頸項強，小便難者，與柴胡湯，後必下重。本渴飲水而嘔者，柴胡湯不中與也，食穀者噦。

99· 傷寒四五日，身熱、惡風、頸項強、脅下滿、手足溫而渴者，小柴胡湯主之。[方]五十。（用前方。）

100· 傷寒，陽脉濇，陰脉弦，法當腹中急痛，先與小建中湯；不差者，小柴胡湯主之。[方]五十一。（用前方。）

小建中湯方：

桂枝三兩（去皮） 甘草二兩（炙） 大棗十二枚（擘） 芍藥（六兩） 生薑三兩（切）  
膠飴一升

上六味，以水七升，煮取三升，去滓，內飴，更上微火消解。溫服一升，日三服。嘔家不可用建中湯，以甜故也。

101· 傷寒中風，有柴胡證，但見一證便是，不必悉具。凡柴胡湯病證而下之；若柴胡證不罷者，復與柴胡湯，必蒸蒸而振，却復發熱汗出而解。

102· 傷寒二三日，心中悸而煩者，小建中湯主之。[方]五十二。（用前第五十一方。）

103·太陽病，過經十餘日，反二、三下之。後四、五日，柴胡證仍在者，先與小柴胡。嘔不止、心下急、(一云嘔止小安。)鬱鬱微煩者，為未解也，與大柴胡湯下之則愈。方五十三。

柴胡半斤 黃芩三兩 芍藥三兩 半夏半升(洗) 生薑五兩(切) 枳實四枚(炙)  
大棗十二枚(擘)

上七味，以水一斗二升，煮取六升，去滓再煎，溫服一升，日三服。一方，加大黃二兩；若不加，恐不為大柴胡湯。

104·傷寒十三日不解，胃脅滿而嘔，日晡所發潮熱，已而微利。此本柴胡證，下之以不得利；今反利者，知醫以丸藥下之，此非其治也。潮熱者，實也。先宜服小柴胡湯以解外，後以柴胡加芒消湯主之。[方]五十四。

柴胡二兩十六銖 黃芩一兩 人參一兩 甘草一兩(炙) 生薑一兩(切) 半夏二十銖(本云，五枚，洗) 大棗四枚(擘) 芒消二兩

上八味，以水四升，煮取二升，去滓，內芒消，更煮微沸，分溫再服；不解更作。(臣億等謹按金匱玉函，方中無芒消。別一方云，以水七升，下芒消二合、大黃四兩、桑螵蛸五枚，煮取一升半，服五合，微下即愈。本云，柴胡再服，以解其外，餘二升，加芒消、大黃、桑螵蛸也。)

105·傷寒十三日，過經，讞語者，以有熱也，當以湯下之。若小便利者，大便當鞭，而反下利，脈調和者。知醫以丸藥下之，非其治也。若自下利者，脈當微厥，今反和者，此為內實也，調胃承氣湯主之。[方]五十五。(用前第三十三方。)

106·太陽病不解，熱結膀胱，其人如狂，血自下，下者愈。其外不解者，尚未可攻，當先解其外；外解已，但少腹急結者，乃可攻之，宜桃核承氣湯。方五十六。(後云，解外宜桂枝湯。)

桃仁五十箇(去皮尖) 大黃四兩 桂枝二兩(去皮) 甘草二兩(炙) 芒消二兩

上五味，以水七升，煮取二升半，去滓，內芒消，更上火微沸，下火。先食溫服五合，日三服，當微利。

107·傷寒八九日，下之，胃滿、煩驚、小便不利、讞語、一身盡重，不可轉側者，柴胡加龍骨牡

蠭湯主之。方五十七。

柴胡（四兩） 龍骨 黃芩 生薑（切） 鉛[鉛]丹 人參 桂枝（去皮） 茯苓各一兩  
半 半夏二合半（洗） 大黃二兩 牡蠣一兩半（熬） 大棗六枚（擘）

上十二味，以水八升，煮取四升，內大黃，切如碁[棋]子，更煮一兩沸，去滓，溫服一升。本云柴胡湯，今加龍骨等。

108· 傷寒，腹滿、讞語、寸口脉浮而緊，此肝乘脾也，名曰縱，刺期門。[方]五十八。

109· 傷寒發熱，齏齏惡寒、大渴欲飲水，其腹必滿、自汗出、小便利、其病欲解，此肝乘肺也，名曰橫，刺期門。[方]五十九。

110· 太陽病二日，反躁，凡熨其背而大汗出，大熱入胃，（一作二日內燒瓦熨背大汗出，火氣入胃。）胃中水竭，躁煩必發讞語；十餘日振慄自下利者，此為欲解也。故其汗從腰以下不得汗，欲小便不得，反嘔、欲失溲、足下惡風、大便鞭，小便當數，而反不數及不多；大便已，頭卓然而痛，其人足心必熱，穀氣下流故也。

111· 太陽病中風，以火劫發汗。邪風被火熱，血氣流溢，失其常度，兩陽相熏灼，其身發黃。陽盛則欲衄，陰虛小便難。陰陽俱虛竭，身體則枯燥，但頭汗出，劑頸而還。腹滿、微喘，口乾、咽爛，或不大便，久則讞語，甚者至噦、手足躁擾、捻衣摸床。小便利者，其人可治。

112· 傷寒脉浮，醫以火迫劫之，亡陽，必驚狂、臥起不安者，桂枝去芍藥加蜀漆牡蠣龍骨救逆湯主之。方六十。

桂枝三兩（去皮） 甘草二兩（炙） 生薑三兩（切） 大棗十二枚（擘） 牡蠣五兩  
（熬） 蜀漆三兩（洗去腥） 龍骨四兩

上七味，以水一斗二升，先煮蜀漆，減二升；內諸藥，煮取三升，去滓，溫服一升。本云桂枝湯，今去芍藥，加蜀漆牡蠣龍骨。

113· 形作傷寒，其脉不弦緊而弱。弱者必渴，被火必讞語，弱者發熱，脉浮，解之當汗出愈。

114· 太陽病，以火熏之，不得汗，其人必躁；到經不解，必清血，名為火邪。

115·脉浮，熱甚，而反灸之，此為實。實以虛治，因火而動，必咽燥、吐血。

116·微數之脉，慎不可灸。因火為邪，則為煩逆；追虛逐實，血散脉中；火氣雖微，內攻有力，焦骨傷筋，血難復也。脉浮，宜以汗解，用火灸之，邪無從出，因火而盛，病從腰以下，必重而痹，名火逆也。欲自解者，必當先煩，煩乃有汗而解。何以知之？脉浮，故知汗出解。

117·燒針令其汗，針處被寒，核起而赤者，必發奔豚。氣從少腹上衝心者，灸其核上各一壯，與桂枝加桂湯，更加桂二兩也。方六十一。

桂枝五兩（去皮） 芍藥三兩 生薑三兩（切） 甘草二兩（炙） 大棗十二枚（擘）

上五味，以水七升，煮取三升，去滓，溫服一升。本云桂枝湯，今加桂滿五兩。所以加桂者，以能泄奔豚氣也。

118·火逆下之，因燒針煩躁者，桂枝甘草龍骨牡蠣湯主之。方六十二。

桂枝一兩（去皮） 甘草二兩（炙） 牡蠣二兩（熬） 龍骨二兩

上四味，以水五升，煮取二升半，去滓，溫服八合，日三服。

119·太陽傷寒者，加溫針必驚也。

120·太陽病，當惡寒、發熱，今自汗出，反不惡寒、發熱、關上脉細數者，以醫吐之過也。一二日吐之者，腹中飢、口不能食；三四日吐之者，不喜糜粥、欲食冷食、朝食暮吐，以醫吐之所致也，此為小逆。

121·太陽病吐之，但太陽病當惡寒，今反不惡寒，不欲近衣，此為吐之內煩也。

122·病人脉數。數為熱，當消穀引食。而反吐者，此以發汗，令陽氣微，膈氣虛，脉乃數也。數為客熱，不能消穀；以胃中虛冷，故吐也。

123·太陽病，過經十餘日，心下溫溫欲吐而胃中痛，大便反澹，腹微滿，鬱鬱微煩。先此時自極吐下者，與調胃承氣湯；若不爾者，不可與；但欲嘔、胃中痛、微澹者，此非柴胡湯證，以嘔故知極吐下也。調胃承氣湯。[方]六十三。（用前第三十三方。）

124·太陽病六七日，表證仍在，脉微而沈，反不結胷；其人發狂者，以熱在下焦，少腹當鞭滿，

小便自利者，下血乃愈。所以然者，以太陽隨經，瘀熱在裏故也。抵當湯主之。方六十四。

水蛭（熬） 蠪蟲各三十箇（去翅足，熬） 桃仁二十箇（去皮尖） 大黃三兩（酒洗）

上四味，以水五升，煮取三升，去滓，溫服一升，不下更服。

125· 太陽病，身黃、脉沈結、少腹鞭、小便不利者，為無血也；小便自利，其人如狂者，血證諦也，抵當湯主之。[方]六十五。（用前方。）

126· 傷寒有熱，少腹滿，應小便不利，今反利者，為有血也，當下之，不可餘藥，宜抵當丸，方六十六。

水蛭二十箇（熬） 蠪蟲二十箇（熬，去翅足） 桃仁二十五箇（去皮尖） 大黃三兩

上四味，搗分四丸。以水一升，煮一丸，取七合服之。晬時，當下血；若不下者，更服。

127· 太陽病，小便利者，以飲水多，必心下悸；小便少者，必苦裏急也。

辨太陽病脉證并治下

128·問曰：病有結胃、有藏結，其狀何如？答曰：按之痛，寸脉浮、關脉沈，名曰結胃也。

129·何謂藏結？答曰：如結胃狀，飲食如故、時時下利，寸脉浮、關脉小細沈緊，名曰藏結。舌上白苔滑者，難治。

130·藏結，無陽證，不往來寒熱（一云，寒而不熱），其人反靜，舌上苔滑者，不可攻也。

131·病發于陽，而反下之，熱入因作結胃；病發于陰，而反下之，（一作汗出）因作痞也。所以成結胃者，以下之太早故也。結胃者，項亦強，如柔瘕狀，下之則和，宜大陷胃丸。方一。

大黃半斤 葶藶子半升（熬） 芒消半升 杏仁半升（去皮尖，熬黑）

上四味，搗篩二味，內杏仁、芒消，合研如脂，和散。取如彈丸一枚，別搗甘遂末一錢匕、白蜜二合、水二升，煮取一升，溫頓服之，一宿乃下；如不下，更服，取下為效。禁如藥法。

132·結胃證，其脉浮大者，不可下，下之則死。

133·結胃證悉具，煩躁者亦死。

134·太陽病，脉浮而動數，浮則為風、數則為熱、動則為痛、數則為虛；頭痛、發熱、微盜汗出，而反惡寒者，表未解也。醫反下之，動數變遲，膈內拒痛，（一云頭痛即眩）胃中空虛，客氣動膈，短氣躁煩，心中懊惱，陽氣內陷，心下因鞭，則為結胃，大陷胃湯主之。若不結胃，但頭汗出，餘處無汗，劑頸而還，小便不利，身必發黃。大陷胃湯。方二。

大黃六兩（去皮） 芒消一升 甘遂一錢匕

上三味，以水六升，先煮大黃，取二升，去滓；內芒消，煮一兩沸；內甘遂末，溫服一升。得快利，止後服。

135·傷寒六七日，結胃熱實，脉沈而緊，心下痛，按之石鞭者，大陷胃湯主之。[方]三。（用前第二方。）

136·傷寒十餘日，熱結在裏，復往來寒熱者，與大柴胡湯；但結胃，無大熱者，此為水結在胃脅也；但頭微汗出者，大陷胃湯主之。[方]四。（用前第二方。）

大柴胡湯方：

柴胡半斤 枳實四枚（炙） 生薑五兩（切） 黃芩三兩 芍藥三兩 半夏半升（洗）  
大棗十二枚（擘）

上七味，以水一斗二升，煮取六升，去滓再煎。溫服一升，日三服。一方加大黃二兩，若不加，恐不名大柴胡湯。

137·太陽病，重發汗而復下之，不大便五六日，舌上燥而渴，日晡所小有潮熱，（一云日晡所發心胃大煩）從心下至少腹鞭滿而痛不可近者，大陷胃湯主之。[方]五。（用前第二方。）

138·小結胃病，正在心下，按之則痛，脈浮滑者，小陷湯主之。方六。

黃連一兩 半夏半升（洗） 栝樓實大者一枚

上三味，以水六升，先煮栝樓，取三升，去滓；內諸藥，煮取二升，去滓，分溫三服。

139·太陽病，二三日，不能臥，但欲起，心下必結，脈微弱者，此本有寒分也。反下之，若利止，必作結胃；未止者，四日復下之；此作協熱利也。

140·太陽病，下之，其脈促，（一作縱）不結胃者，此為欲解也；脈浮者，必結胃；脈緊者，必咽痛；脈弦者，必兩脅拘急；脈細數者，頭痛未止；脈沈緊者，必欲嘔；脈沈滑者，協熱利；脈浮滑者，必下血。

141·病在陽，應以汗解之；反以冷水澀之。若灌之，其熱被劫不得去，彌更益煩，肉上粟起，意欲飲水，反不渴者，服文蛤散；若不差者，與五苓散；寒實結胃，無熱證者，與三物小陷胃湯，（用前第六方）白散亦可服。[方]七。（一云與三物小白散）

文蛤散方：

文蛤五兩

上一味為散，以沸湯和一方寸匕服。湯用五合。

五苓散方：

豬苓十八銖（去黑皮） 白朮十八銖 澤瀉一兩六銖 茯苓十八銖 桂枝半兩（去皮）

上五味為散，更於臼中治[杵]之。白飲和方寸匕服之，日三服；多飲煖水，汗出愈。

白散方：

桔梗三分 巴豆一分（去皮心，熬黑，研如脂） 貝母三分

上三味為散，內巴豆，更於臼中杵之，以白飲和服。強人半錢匕，羸者減之。病在膈上必吐，在膈下必利。不利，進熱粥一杯；利過不止，進冷粥一杯。身熱、皮粟不解，欲引衣自覆；若以水澀之洗之，益令熱劫不得出，當汗而不汗則煩。假令汗出已，腹中痛，與芍藥三兩如上法。

142·太陽與少陽併病，頭項強痛，或眩冒，時如結胷，心下痞鞭者，當刺大椎第一間、肺俞、肝俞，慎不可發汗；發汗則讞語、脉弦，五日讞語不止，當刺期門。[方]八。

143·婦人中風，發熱惡寒，經水適來，得之七八日，熱除而脉遲、身涼、胷脅下滿，如結胷狀，讞語者，此為熱入血室也，當刺期門，隨其實而取之。[方]九。

144·婦人中風，七八日續得寒熱，發作有時，經水適斷者，此為熱入血室，其血必結，故使如瘧狀發作有時，小柴胡湯主之。方十。

柴胡半斤 黃芩三兩 人參三兩 半夏半升（洗） 甘草三兩 生薑三兩（切） 大棗十二枚（擘）

上七味，以水一斗二升，煮取六升，去滓；再煎取三升，溫服一升，日三服。

145·婦人傷寒，發熱，經水適來，晝日明了，暮則讞語，如見鬼狀者，此為熱入血室。無犯胃氣，及上二焦，必自愈。[方]十一。

146·傷寒六七日，發熱、微惡寒、支[肢]節煩痛、微嘔、心下支結、外證未去者，柴胡桂枝湯主之。方十二。

桂枝（去皮）[缺量]黃芩一兩半 人參一兩半 甘草一兩（炙） 半夏二合半（洗） 芍藥一兩半 大棗六枚（擘） 生薑一兩半（切） 柴胡四兩

上九味，以水七升，煮取三升，去滓，溫服一升。本云人參湯，作如桂枝法，加半夏、柴胡、黃芩，復如柴胡法。今用人參作半劑。

147·傷寒五六日，已發汗而復下之，胃脅滿微結、小便不利、渴而不嘔、但頭汗出、往來寒熱、心煩者，此為未解也，柴胡桂枝乾薑湯主之。方十三。

柴胡半斤 桂枝三兩（去皮） 乾薑二兩 枳椇根四兩 黃芩三兩 牡蠣二兩（熬） 甘草二兩（炙）

上七味，以水一斗二升，煮取六升，去滓，再煎取三升，溫服一升。日三服，初服微煩，復服汗出便愈。

148·傷寒五六日，頭汗出、微惡寒、手足冷、心下滿、口不欲食、大便鞭、脉細者，此為陽微結，必有表，復有裏也。脉沈，亦在裏也。汗出，為陽微；假令純陰結，不得復有外證，悉入在裏，此為半在裏半在外也。脉雖沈緊，不得為少陰病。所以然者，陰不得有汗，今頭汗出，故知非少陰也，可與小柴胡湯；設不了了者，得屎而解。[方]十四。（用前第十方。）

149·傷寒五六日，嘔而發熱者，柴胡湯證具，而以他藥下之，柴胡證仍在者，復與柴胡湯。此雖已下之，不為逆，必蒸蒸而振，却發熱汗出而解。若心下滿而鞭痛者，此為結胸也，大陷胸湯主之；但滿而不痛者，此為痞，柴胡不中與之，宜半夏瀉心湯。方十五。

半夏半升（洗） 黃芩 乾薑 人參 甘草各三兩（炙） 黃連一兩 大棗十二枚（擘）

上七味，以水一斗，煮取六升，去滓；再煎取三升，溫服一升，日三服。須大陷胸湯者，方用前第二法。（一方用半夏一升。）

150·太陽、少陽併病，而反下之，成結胸；心下鞭，下利不止，水漿不下，其人心煩。

151·脉浮而緊，而復下之，緊反入裏，則作痞。按之自濡，但氣痞耳。

152·太陽中風，下利、嘔逆，表解者，乃可攻之。其人漉漉汗出，發作有時，頭痛、心下痞鞭滿、引脅下痛、乾嘔、短氣、汗出不惡寒者，此表解裏未和也，十棗湯主之。方十六。

芫花（熬） 甘遂 大戟

上三味，等分，各別搗為散。以水一升半，先煮大棗肥者十枚，取八合，去滓，內藥末。強人服一錢匕，羸人服半錢，溫服之。平旦服。若下少，病不除者，明日更服，加半錢；得快下利後，

糜粥自養。

153·太陽病，醫發汗，遂發熱、惡寒；因復下之，心下痞。表裏俱虛，陰陽氣並竭，無陽則陰獨。復加燒針，因胃煩、面色青黃、膚瞶者，難治；今色微黃；手足溫者，易愈。

154·心下痞，按之濡，其脉關上浮者，大黃黃連瀉心湯主之。方十七。

大黃二兩 黃連一兩 [缺黃芩?]

上二味，以麻沸湯二升漬之，須臾絞去滓。分溫再服。(臣億等看詳大黃黃連瀉心湯，諸本皆二味；又後附子瀉心湯，用大黃、黃連、黃芩、附子，恐是前方中亦有黃芩，後但加附子也。故後云附子瀉心湯，本云加附子也。)

155·心下痞，而復惡寒、汗出者，附子瀉心湯主之。方十八。

大黃二兩 黃連一兩 黃芩一兩 附子一枚(炮，去皮，破，別煮取汁)

上四味，切三味，以麻沸湯二升漬之，須臾絞去滓，內附子汁，分溫再服。

156·本以下之，故心下痞；與瀉心湯，痞不解。其人渴而口燥煩、小便不利者，五苓散主之。[方十九。一方云，忍之一日乃愈。(用前第七證方。)]

157·傷寒汗出解之後，胃中不和，心下痞鞭，乾噫食臭，脅下有水氣，腹中雷鳴下利者，生薑瀉心湯主之。方二十。

生薑四兩(切) 甘草三兩(炙) 人參三兩 乾薑一兩 黃芩三兩 半夏半升(洗)  
黃連一兩 大棗十二枚(擘)

上八味，以水一斗，煮取六升，去滓，再煎取三升。溫服一升，日三服。附子瀉心湯，本云加附子，半夏瀉心湯，甘草瀉心湯，同體別名耳。生薑瀉心湯，本云理中人參黃芩湯，去桂枝、朮，加黃連，并瀉肝法。

158·傷寒中風，醫反下之，其人下利，日數十行，穀不化，腹中雷鳴，心下痞鞭而滿，乾嘔心煩不得安。醫見心下痞，謂病不盡，復下之，其痞益甚。此非結熱，但以胃中虛，客氣上逆，故使鞭也。甘草瀉心湯主之。方二十一。

甘草四兩（炙） 黃芩三兩 乾薑三兩 半夏半升（洗） 大棗十二枚（擘） 黃連一兩

[缺人參?]

上六味，以水一斗，煮取六升，去滓；再煎取三升。溫服一升，日三服。（臣億等謹按上生薑瀉心湯法，本云理中人參黃芩湯，今詳瀉心以療痞。痞氣因發陰而生，是半夏、生薑、甘草瀉心三方，皆本於理中也，其方必各有人參，今甘草瀉心中無者，脫落之也。又按千金并外台秘要治傷寒食，用此方，皆有人參，知脫落無疑。）

159·傷寒服湯藥，下利不止，心下痞鞭，服瀉心湯已，復以他藥下之；利不止；醫以理中與之，利益甚，理中者，理中焦，此利在下焦，赤石脂禹餘糧湯主之。復不止者，當利其小便。赤石脂禹餘糧湯。方二十二。

赤石脂一斤（碎） 太一禹餘糧一斤（碎）

上二味，以水六升，煮取二升，去滓，分溫三服。

160·傷寒吐下後，發汗，虛煩，脈甚微，八九日，心下痞鞭、脅下痛、氣上衝咽喉、眩冒、經脈動惕者，久而成痿。

161·傷寒發汗、若吐、若下，解後，心下痞鞭，噫氣不除者，旋復代赭湯主之。方二十三。

旋復花三兩 人參二兩 生薑五兩 代赭一兩 甘草三兩（炙） 半夏半升（洗） 大棗十二枚（擘）

上七味，以水一斗，煮取六升，去滓，再煎取三升。溫服一升，日三服。

162·下後，不可更行桂枝湯；若汗出而喘，無大熱者，可與麻黃杏子甘草石膏湯。方二十四。

麻黃四兩 杏仁五十箇（去皮尖） 甘草二兩（炙） 石膏半斤（碎，綿裹）

上四味，以水七升，先煮麻黃，減二升，去白沫；內諸藥，煮取三升。去滓，溫服一升。本云黃耳杯。

163·太陽病，外證未除而數下之，遂協熱而利，利下不止，心下痞鞭、表裏不解者，桂枝人參湯主之。方二十五。

桂枝四兩（別切） 甘草四兩（炙） 白朮三兩 人參三兩 乾薑三兩

上五味，以水九升，先煮四味，取五升；內桂，更煮取三升，去滓。溫服一升，日再夜一服。

164·傷寒大下後復發汗，心下痞、惡寒者，表未解也。不可攻痞，當先解表，表解乃可攻痞；解表宜桂枝湯，攻痞宜大黃黃連瀉心湯。[方]二十六。（瀉心湯用前第十七方。）

165·傷寒發熱、汗出不解，心中痞鞭、嘔吐而下利者，大柴胡湯主之。[方]二十七。（用前第四方。）

166·病如桂枝證，頭不痛、項不強、寸脉微浮、胃中痞鞭、氣上衝喉咽不得息者，此為胃有寒也。當吐之，宜瓜蒂散。方二十八。

瓜蒂一分（熬黃） 赤小豆一分

上二味，各別搗篩，為散已，合治之。取一錢匕，以香豉一合，用熱湯七合煮作稀糜，去滓，取汁和散，溫頓服之。不吐者，少少加；得快吐乃止。諸亡血虛家，不可與瓜蒂散。

167·病脅下素有痞，連在臍旁，痛引少腹，入陰筋者，此名藏結，死。[方]二十九。

168·傷寒若吐若下後，七八日不解，熱結在裏，表裏俱熱，時時惡風、大渴、舌上乾燥而煩、欲飲水數升者，白虎加人參湯主之。方三十。

知母六兩 石膏一斤（碎） 甘草二兩（炙） 人參二兩 粳米六合

上五味，以水一斗，煮米熟，湯成去滓，溫服一升，日三服。此方立夏後、立秋前，乃可服；立秋後不可服；正月、二月、三月尚凜冷，亦不可與服之，與之則嘔利而腹痛。諸亡血虛家，亦不可與，得之則腹痛利者，但可溫之，當愈。

169·傷寒無大熱、口燥渴、心煩、背微惡寒者，白虎加人參湯主之。[方]三十一。（用前方。）

170·傷寒脉浮、發熱、無汗，其表不解，不可與白虎湯。渴欲飲水，無表證者，白虎加人參湯主之。[方]三十二。（用前方。）

171·太陽、少陽併病，心下鞭、頸項強而眩者，當刺大椎、肺俞、肝俞，慎勿下之。[方]三十三。

172·太陽與少陽合病，自下利者，與黃芩湯；若嘔者，黃芩加半夏生薑湯主之。方三十四。

黃芩湯方：

黃芩三兩 芍藥二兩 甘草二兩（炙） 大棗十二枚（擘）

上四味，以水一斗，煮取三升，去滓，溫服一升，日再，夜一服。

黃芩加半夏生薑湯方：

黃芩三兩 芍藥二兩 甘草二兩（炙） 大棗十二枚（擘） 半夏半升（洗） 生薑一兩

半（切，一方三兩）

上六味，以水一斗，煮取三升，去滓，溫服一升，日再，夜一服。

173·傷寒，胃中有熱，胃中有邪氣，腹中痛，欲嘔吐者，黃連湯主之。方三十五。

黃連三兩 甘草三兩（炙） 乾薑三兩 桂枝三兩（去皮） 人參二兩 半夏半升（洗）

大棗十二枚（擘）

上七味，以水一斗，煮取六升；去滓，溫服。晝三夜二。疑非仲景方。

174·傷寒八九日，風濕相搏，身體疼煩，不能自轉側，不嘔、不渴、脈浮虛而澹者，桂枝附子湯主之。若其人大便鞭，（一云臍下心下鞭）小便自利者，去桂加白朮湯主之。[方]三十六。

桂枝附子湯方：

桂枝四兩（去皮） 附子三枚（炮，去皮，破） 生薑三兩（切） 大棗十二枚（擘） 甘草

二兩（炙）

上五味，以水六升，煮取二升，去滓，分溫三服。

去桂加白朮湯方：

附子三枚（炮，去皮，破） 白朮四兩 生薑三兩（切） 甘草二兩（炙） 大棗十二枚

（擘）

上五味，以水六升，煮取二升，去滓，分溫三服。初一服，其人身如痺，半日許復服之；三服都盡，其人如冒狀，勿怪。此以附子、朮，併走皮內，逐水氣未得除，故使之耳。法當加桂四兩。此本一方二法：以大便鞭，小便自利，去桂也；以大便不鞭，小便不利，當加桂。附子三枚恐多也，虛弱家及產婦，宜減服之。

175·風濕相搏，骨節疼煩，掣痛不得屈伸，近之則痛劇，汗出短氣，小便不利，惡風不欲去衣，或身微腫者，甘草附子湯主之。方三十七。

甘草二兩（炙） 附子二枚（炮，去皮，破） 白朮二兩 桂枝四兩（去皮）

上四味，以水六升，煮取三升，去滓，溫服一升，日三服。初服得微汗則解；能食、汗止復煩者，將服五合；恐一升多者，宜服六七合為始。

176·傷寒脉浮滑，此以表有熱、裏有寒，白虎湯主之。方三十八。

知母六兩 石膏一斤（碎） 甘草二兩（炙） 粳米六合

上四味，以水一斗，煮米熟，湯成去滓，溫服一升，日三服。（臣億等謹按前篇云：熱結在裏，表裏俱熱者，白虎湯主之，又云其表不解，不可與白虎湯。此云脉浮滑，表有熱、裏有寒者，必表裏字差矣。又陽明一證云：脉浮遲，表熱裏寒，四逆湯主之。又少陰一證云：裏寒外熱，通脉四逆湯主之。以此表裏自差明矣。千金翼云：白通湯。非也。）

177·傷寒脉結代、心動悸，炙甘草湯主之。方三十九。

甘草四兩（炙） 生薑三兩（切） 人參二兩 生地黃一斤 桂枝三兩（去皮） 阿膠二兩  
麥門冬半升（去心） 麻仁半升 大棗三十枚（擘）

上九味，以清酒七升，水八升，先煮八味，取三升，去滓，內膠烊消盡，溫服一升，日三服。  
一名復脉湯。

178·脉按之來緩，時一止復來者，名曰結。又脉來動而中止，更來小數，中有還者反動，名曰結，陰也；脉來動而中止，不能自還，因而復動者，名曰代，陰也，得此脉者必難治。

辨陽明病脉證并治

179·問曰：病有太陽陽明，有正陽陽明，有少陽陽明，何謂也？答曰：太陽陽明者，脾約（一云絡）是也；正陽陽明者，胃家實是也；少陽陽明者，發汗、利小便已，胃中燥、煩、實、大便難是也。

180·陽明之為病，胃家實（一作寒）是也。

181·問曰：何緣得陽明病，答曰：太陽病，若發汗、若下、若利小便，此亡津液，胃中乾燥，因轉屬陽明。不更衣，內實大便難者，此名陽明也。

182·問曰：陽明病外證云何？答曰：身熱、汗自出、不惡寒反惡熱也。

183·問曰：病有得之一日，不發熱而惡寒者，何也？答曰：雖得之一日，惡寒將自罷，即汗出而惡熱也。

184·問曰：惡寒何故自罷？答曰：陽明居中，主土也。萬物所歸，無所復傳。始雖惡寒，二日自止，此為陽明病也。

185·本太陽，初得病時，發其汗，汗先出不徹，因轉屬陽明也。傷寒發熱、無汗、嘔不能食、而反汗出濇濇然者，是轉屬陽明也。

186·傷寒三日，陽明脉大。

187·傷寒脉浮而緩，手足自溫者，是為繫在太陰。太陰者，身當發黃；若小便自利者，不能發黃；至七八日，大便鞭者，為陽明病也。

188·傷寒轉繫陽明者，其人濇然微汗出也。

189·陽明中風，口苦、咽乾、腹滿、微喘、發熱、惡寒、脉浮而緊。若下之，則腹滿小便難也。

190·陽明病，若能食，名中風；不能食，名中寒。

191·陽明病，若中寒者，不能食，小便不利，手足濇然汗出，此欲作固瘕，必大便初鞭後溏。所以然者，以胃中冷，水穀不別故也。

192·陽明病，初欲食，小便反不利，大便自調，其人骨節疼，翕翕如有熱狀，奄然發狂，濇然汗

出而解者，此水不勝穀氣，與汗共并，脉緊則愈。

193·陽明病，欲解時，從申至戌上。

194·陽明病，不能食，攻其熱必噦。所以然者，胃中虛冷故也。以其人本虛，攻其熱必噦。

195·陽明病，脉遲，食難用飽。飽則微煩頭眩，必小便難，此欲作穀瘕，雖下之，腹滿如故。所以然者，脉遲故也。

196·陽明病，法多汗，反無汗，其身如蟲行皮中狀者，此以久虛故也。

197·陽明病，反無汗而小便利，二三日嘔而欬，手足厥者，必苦頭痛；若不欬、不嘔、手足不厥者，頭不痛。（一云冬陽明。）

198·陽明病，但頭眩，不惡寒。故能食而欬，其人咽必痛；若不欬者，咽不痛。（一云冬陽明）

199·陽明病，無汗、小便不利、心中懊懣者，身必發黃。

200·陽明病，被火，額上微汗出而小便不利者，必發黃。

201·陽明病，脉浮而緊者，必潮熱發作有時；但浮者，必盜汗出。

202·陽明病，口燥但欲漱水，不欲嚥者，此必衄。

203·陽明病，本自汗出。醫更重發汗，病已差，尚微煩不了了者，此必大便鞅故也。以亡津液，胃中乾燥，故令大便鞅。當問其小便日幾行，若本小便日三四行，今日再行，故知大便不久出。今為小便數少，以津液當還入胃中，故知不久必大便也。

204·傷寒嘔多，雖有陽明證，不可攻之。

205·陽明病，心下鞅滿者，不可攻之。攻之，利遂不止者死；利止者愈。

206·陽明病，面合色赤，不可攻之。必發熱，色黃者，小便不利也。

207·陽明病，不吐、不下、心煩者，可與調胃承氣湯。方一。

甘草二兩（炙） 芒消半斤 大黃四兩（清酒洗）

上三味，切，以水三升，煮二物至一升，去滓；內芒消，更上微火一二沸，溫頓服之，以調胃氣。

208·陽明病，脉遲，雖汗出不惡寒者，其身必重，短氣，腹滿而喘，有潮熱者，此外欲解，可攻裏也。手足濇然汗出者，此大便已鞅也，大承氣湯主之；若汗多，微發熱惡寒者，外未解也；（一法與桂枝湯）其熱不潮，未可與承氣湯；若腹大滿不通者，可與小承氣湯，微和胃氣，勿令至大泄下。大承氣湯。方二。

大黃四兩（酒洗） 厚朴半斤（炙，去皮） 枳實五枚（炙） 芒消三合

上四味，以水一斗，先煮二物，取五升，去滓；內大黃，更煮取二升，去滓；內芒消，更上微火一兩沸，分溫再服。得下，餘勿服。

小承氣湯方：

大黃四兩（酒洗） 厚朴二兩（去皮，炙） 枳實三枚（大者，炙）

上三味，以水四升，煮取一升二合，去滓，分溫二服。初服湯當更衣，不爾者盡飲之；若更衣者，勿服之。

209·陽明病，潮熱、大便微鞅者，可與大承氣湯；不鞅者，不可與之。若不大便六七日，恐有燥屎，欲知之法，少與小承氣湯，湯入腹中，轉失氣者，此有燥屎也，乃可攻之；若不轉失氣者，此但初頭鞅，後必溏，不可攻之，攻之必脹滿，不能食也。欲飲水者，與水則噦，其後發熱者，必大便復鞅而少也，以小承氣湯和之；不轉失氣者，慎不可攻也。小承氣湯。[方]三。（用前第二方。）

210·夫實則讞語，虛則鄭聲。鄭聲者，重語也；直視、讞語、喘滿者死，下利者亦死。

211·發汗多，若重發汗者，亡其陽，讞語，脉短者死；脉自和者不死。

212·傷寒若吐、若下後，不解，不大便五六日，上至十餘日，日晡所發潮熱，不惡寒，獨語如見鬼狀；若劇者，發則不識人，循衣摸床，惕而不安，（一云順衣妄撮怵惕不安）微喘直視，脉弦者生，濇者死，微者但發熱。讞語者，大承氣湯主之。若一服利，則止後服。[方]四。（用前第一方。）

213·陽明病，其人多汗，以津液外出，胃中燥，大便必鞅，鞅則讞語，小承氣湯主之。若一服讞語止者，更莫復服。[方]五。（用前第二方。）

214·陽明病，讞語、發潮熱、脉滑而疾者，小承氣湯主之。因與承氣湯一升，腹中轉氣者，更服

一升；若不轉氣者，勿更與之。明日又不大便，脉反微澹者，裏虛也，為難治，不可更與承氣湯也。

[方]六。(用前第二方。)

215·陽明病，讞語、有潮熱、反不能食者，胃中必有燥屎五六枚也；若能食者，但鞭耳。宜大承氣湯下之。[方]七。(用前第二方。)

216·陽明病、下血、讞語者，此為熱入血室。但頭汗出者，刺期門，隨其實而寫之，濺然汗出則愈。

217·汗(汗一作臥)出讞語者，以有燥屎在胃中，此為風也。須下者，過經乃可下之；下之若早，語言必亂，以表虛裏實故也。下之愈，宜大承氣湯。[方]八。(用前第二方，一云大柴胡湯。)

218·傷寒四五日，脉沈而喘滿。沈為在裏，而反發其汗，津液越出，大便為難；表虛裏實，久則讞語。

219·三陽合病，腹滿、身重，難以轉側，口不仁、面垢、(又作枯，一云向經)讞語、遺尿。發汗，則讞語；下之，則額上生汗、手足逆冷；若自汗出者，白虎湯主之。方九。

知母六兩 石膏一斤(碎) 甘草二兩(炙) 粳米六合

上四味，以水一斗，粳米熟，湯成去滓。溫服一升，日三服。

220·二陽併病，太陽證罷，但發潮熱，手足熱汗出、大便難而讞語者，下之則愈，宜大承氣湯。[方]十。(用前第二方。)

221·陽明病，脉浮而緊、咽燥、口苦、腹滿而喘、發熱汗出、不惡寒反惡熱、身重，若發汗則躁，心憤憤(公對切)反讞語；若加溫針，必怵惕煩躁不得眠；若下之，則胃中空虛，客氣動膈，心中懊懣。舌上苔者，梔子豉湯主之。方十一。

肥梔子十四枚(擘) 香豉四合(綿裹)

上二味，以水四升，煮梔子取二升半，去滓；內豉，更煮取一升半，去滓，分二服。溫進一服，得快吐者，止後服。

222·若渴欲飲水，口乾舌燥者，白虎加人參湯主之。方十二。

知母六兩 石膏一斤（碎） 甘草二兩（炙） 粳米六合 人參三兩

上五味，以水一斗，粳米熟，湯成去滓，溫服一升，日三服。

223·若脉浮、發熱、渴欲飲水、小便不利者，豬苓湯主之。方十三。

豬苓（去皮） 茯苓 澤瀉 阿膠 滑石各一兩（碎）

上五味，以水四升，先煮四味，取二升，去滓；內阿膠烱消。溫服七合，日三服。

224·陽明病，汗出多而渴者，不可與豬苓湯。以汗多胃中燥，豬苓湯復利其小便故也。

225·脉浮而遲，表熱裏寒，下利清穀者，四逆湯主之。方十四。

甘草二兩（炙） 乾薑一兩半 附子一枚（生用，去皮，破八片）

上三味，以水三升，煮取一升二合，去滓，分溫二服。強人可大附子一枚，乾薑三兩。

226·若胃中虛冷，不能食者，飲水則噦。

227·脉浮、發熱，口乾、鼻燥、能食者則衄。

228·陽明病，下之，其外有熱，手足溫，不結胷，心中懊憹，飢不能食，但頭汗出者，梔子豉湯主之。方十五。（用前第十一方。）

229·陽明病，發潮熱、大便溏、小便自可、胃脅滿不去者，與小柴胡湯。方十六。

柴胡半斤 黃芩三兩 人參三兩 半夏半升（洗） 甘草三兩（炙） 生薑三兩（切）

大棗十二枚（擘）

上七味，以水一斗二升，煮取六升，去滓，再煎取三升。溫服一升，日三服。

230·陽明病，脅下鞭滿，不大便而嘔，舌上白苔者，可與小柴胡湯。上焦得通，津液得下，胃氣因和，身濺然汗出而解。[方]十七。（用上方。）

231·陽明中風，脉弦浮大，而短氣，腹都滿，脅下及心痛，久按之氣不通，鼻乾，不得汗，嗜臥，一身及目悉黃，小便難，有潮熱，時時噦，耳前後腫，刺之小差，外不解。病過十日，脉續浮者，與小柴胡湯。[方]十八。（用上方。）

232·脉但浮，無餘證者，與麻黃湯。若不尿，腹滿加噦者，不治。麻黃湯。方十九。

麻黃三兩（去節） 桂枝二兩（去皮） 甘草一兩（炙） 杏仁七十箇（去皮尖）

上四味，以水九升，煮麻黃減二升，去白沫；內諸藥，煮取二升半，去滓。溫服八合，覆取微似汗。

233·陽明病，自汗出。若發汗，小便自利者，此為津液內竭，雖鞭不可攻之；當須自欲大便，宜蜜煎導而通之。若土瓜根及大豬膽汁，皆可為導。[方]二十。

蜜煎方。

食蜜七合

上一味，於銅器內微火煎，當須凝如飴狀，攪之勿令焦著，欲可丸，併手捻作挺，令頭銳，大如指，長二寸許。當熱時急作，冷則鞭。以內穀道中，以手急抱，欲大便時乃去之。疑非仲景意，已試甚良。

又大豬膽一枚，瀉汁，和少許法醋，以灌穀道內，如一食頃，當大便出宿食惡物，甚效。

234·陽明病，脈遲、汗出多、微惡寒者，表未解也，可發汗，宜桂枝湯。[方]二十一。

桂枝三兩（去皮） 芍藥三兩 生薑三兩 甘草二兩（炙） 大棗十二枚（擘）

上五味，以水七升，煮取三升，去滓，溫服一升。須臾，啜熱稀粥一升，以助藥力，取汗。

235·陽明病，脈浮、無汗而喘者，發汗則愈，宜麻黃湯。[方]二十二。（用前第十九方）

236·陽明病，發熱、汗出者，此為熱越，不能發黃也。但頭汗出，身無汗，劑頸而還，小便不利，渴引水漿者，此為瘀熱在裏，身必發黃，茵陳蒿湯主之。方二十三。

茵陳蒿六兩 梔子十四枚（擘） 大黃二兩（去皮）

上三味，以水一斗二升，先煮茵陳，減六升；內二味，煮取三升，去滓，分三服。小便當利，尿如皂莢汁狀，色正赤，一宿腹減，黃從小便去也。

237·陽明證，其人喜忘者，必有畜血。所以然者，本有久瘀血，故令喜忘；屎雖鞭，大便反易，其色必黑者，宜抵當湯下之。方二十四。

水蛭（熬） 蠪蟲各三十箇（去翅足，熬） 大黃三兩（酒洗） 桃仁二十箇（去皮尖及兩人

[仁]者)

上四味，以水五升，煮取三升，去滓，溫服一升；不下更服。

238·陽明病，下之，心中懊憹而煩，胃中有燥屎者，可攻。腹微滿，初頭鞭，後必溏，不可攻之。

若有燥屎者，宜大承氣湯。[方]二十五。(用前第二方。)

239·病人不大便五六日，繞臍痛、煩躁、發作有時者，此有燥屎，故使不大便也。

240·病人煩熱，汗出則解；又如瘧狀，日晡所發熱者，屬陽明也。脉實者，宜下之；脉浮虛者，宜發汗。下之與大承氣湯，發汗宜桂枝湯。[方]二十六。(大承氣湯用前第二方，桂枝湯用前第二十一方。)

241·大下後，六七日不大便，煩不解，腹滿痛者，此有燥屎也。所以然者，本有宿食故也，宜大承氣湯。[方]二十七。(用前第二方。)

242·病人小便不利，大便乍難乍易，時有微熱，喘冒（一作怫鬱）不能臥者，有燥屎也，宜大承氣湯。[方]二十八。(用前第二方。)

243·食穀欲嘔，屬陽明也，吳茱萸湯主之。得湯反劇者，屬上焦也。吳茱萸湯。方二十九。

吳茱萸一升（洗） 人參三兩 生薑六兩（切） 大棗十二枚（擘）

上四味，以水七升，煮取二升，去滓，溫服七合。日三服。

244·太陽病，寸緩、關浮、尺弱，其人發熱，汗出，復惡寒，不嘔，但心下痞者，此以醫下之也。

如其不下者，病人不惡寒而渴者，此轉屬陽明也。小便數者，大便必鞭，不更衣十日，無所苦也。

渴欲飲水，少少與之，但以法救之。渴者，宜五苓散。方三十。

豬苓（去皮） 白朮 茯苓各十八銖 澤瀉一兩六銖 桂枝半兩（去皮）

上五味，為散，白飲和服方寸匕，日三服。

245·脉陽微而汗出少者，為自和（一作如）也；汗出多者，為太過；陽脉實，因發其汗，出多者，亦為太過。太過者，為陽絕於裏，亡津液，大便因鞭也。

246·脉浮而芤，浮為陽，芤為陰；浮芤相搏，胃氣生熱，其陽則絕。

247· 跌陽脉浮而濇，浮則胃氣強，濇則小便數；浮濇相搏，大便則鞭，其脾為約，麻子仁丸主之。

方三十一。

麻子仁二升 芍藥半斤 枳實半斤（炙） 大黃一斤（去皮） 厚朴一尺（炙，去皮） 杏仁一升（去皮尖，熬，別作脂）

上六味，蜜和丸如梧桐子大。飲服十丸，日三服，漸加，以知為度。

248· 太陽病三日，發汗不解，蒸蒸發熱者，屬胃也，調胃承氣湯主之。[方]三十二。（用前第一方。）

249· 傷寒吐後，腹脹滿者，與調胃承氣湯。[方]三十三。（用前第一方。）

250· 太陽病，若吐、若下、若發汗後，微煩，小便數、大便因鞭者，與小承氣湯，和之愈。[方]三十四。（用前第二方。）

251· 得病二三日，脉弱，無太陽柴胡證，煩躁、心下鞭；至四五日，雖能食，以小承氣湯，少少與，微和之，令小安；至六日，與承氣湯一升。若不大便六七日，小便少者，雖不受食，（一云不大便）但初頭鞭，後必溏，未定成鞭，攻之必溏；須小便利，尿定鞭，乃可攻之，宜大承氣湯。[方]三十五。（用前第二方。）

252· 傷寒六七日，目中不了了，睛不和，無表裏證，大便難，身微熱者，此為實也。急下之，宜大承氣湯。[方]三十六。（用前第二方。）

253· 陽明病，發熱、汗多者，急下之，宜大承氣湯。[方]三十七。（用前第二方，一云大柴胡湯。）

254· 發汗不解，腹滿痛者，急下之，宜大承氣湯。[方]三十八。（用前第二方。）

255· 腹滿不減，減不足言，當下之，宜大承氣湯。[方]三十九。（用前第二方。）

256· 陽明少陽合病，必下利。其脉不負者，為順也；負者，失也。互相克賊，名為負也。脉滑而數者，有宿食也，當下之，宜大承氣湯。[方]四十。（用前第二方。）

257· 病人無表裏證，發熱七八日，雖脉浮數者，可下之。假令已下，脉數不解，合熱則消穀喜飢，至六七日，不大便者，有瘀血，宜抵當湯。[方]四十一。（用前第二十四方。）

258· 若脉數不解，而下不止，必協熱便膿血也。

259·傷寒發汗已，身目為黃，所以然者，以寒濕（一作溫）在裏，不解故也。以為不可下也，於寒濕中求之。

260·傷寒七八日，身黃如橘子色，小便不利，腹微滿者，茵陳蒿湯主之。[方]四十二。（用前第二十三方。）

261·傷寒身黃發熱，梔子蘘皮湯主之。方四十三。

肥梔子十五箇（擘） 甘草一兩（炙） 黃蘘二兩

上三味，以水四升，煮取一升半，去滓，分溫再服。

262·傷寒瘀熱在裏，身必黃，麻黃連軹赤小豆湯主之。方四十四。

麻黃二兩（去節） 連軹二兩（連翹根是） 杏仁四十箇（去皮尖） 赤小豆一升 大棗十二枚（擘） 生梓白皮一升（切） 生薑二兩（切） 甘草二兩（炙）

上八味，以潦水一斗，先煮麻黃再沸，去上沫，內諸藥，煮取三升，去滓。分溫三服，半日服盡。

辨少陽病脉證并治

263·少陽之為病，口苦、咽乾、目眩也。

264·少陽中風，兩耳無所聞、目赤、胃中滿而煩者，不可吐下，吐下則悸而驚。

265·傷寒，脉弦細、頭痛發熱者，屬少陽。少陽不可發汗，發汗則譫語。此屬胃，胃和則愈；胃不和，煩而悸。（一云躁。）

266·本太陽病不解，轉入少陽者，脅下鞭滿，乾嘔不能食，往來寒熱，尚未吐下，脉沈緊者，與小柴胡湯。方一。

柴胡八兩 人參三兩 黃芩三兩 甘草三兩（炙） 半夏半升（洗） 生薑三兩（切）

大棗十二枚（擘）

上七味，以水一斗二升，煮取六升，去滓，再煎取三升，溫服一升，日三服。

267·若已吐、下、發汗、溫針，譫語，柴胡湯證罷，此為壞病。知犯何逆，以法治之。

268·三陽合病，脉浮大，上關上，但欲眠睡，目合則汗。

269·傷寒六七日，無大熱，其人躁煩者，此為陽去入陰故也。

270·傷寒三日，三陽為盡，三陰當受邪。其人反能食而不嘔，此為三陰不受邪也。

271·傷寒三日，少陽脉小者，欲已也。

272·少陽病欲解時，從寅至辰上。

辨太陰病脉證并治

273·太陰之為病，腹滿而吐，食不下，自利益甚，時腹自痛。若下之，必胃下結鞭。

274·太陰中風，四肢煩疼，陽微陰濇而長者，為欲愈。

275·太陰病欲解時，從亥至丑上。

276·太陰病，脉浮者，可發汗，宜桂枝湯。方一。

桂枝三兩（去皮） 芍藥三兩 甘草二兩（炙） 生薑三兩（切） 大棗十二枚（擘）

上五味，以水七升，煮取三升，去滓，溫服一升。須臾啜熱稀粥一升，以助藥力，溫覆取汗。

277·自利、不渴者，屬太陰，以其藏有寒故也，當溫之。宜服四逆輩。[方]二。

278·傷寒脉浮而緩，手足自溫者，繫在太陰。太陰當發身黃；若小便自利者，不能發黃。至七八日，雖暴煩下利，日十餘行，必自止。以脾家實，腐穢當去故也。

279·本太陽病，醫反下之，因爾腹滿時痛者，屬太陰也，桂枝加芍藥湯主之；大實痛者，桂枝加大黃湯主之。[方]三。

桂枝加芍藥湯方：

桂枝三兩（去皮） 芍藥六兩 甘草二兩（炙） 大棗十二枚（擘） 生薑三兩（切）

上五味，以水七升，煮取三升，去滓，溫分三服。本云桂枝湯，今加芍藥。

桂枝加大黃湯方：

桂枝三兩（去皮） 大黃二兩 芍藥六兩 生薑三兩（切） 甘草二兩（炙） 大棗十二枚（擘）

上六味，以水七升，煮取三升，去滓，溫服一升，日三服。

280·太陰為病，脉弱，其人續自便利，設當行大黃、芍藥者，宜減之，以其人胃氣弱，易動故也。

（下利者先煎芍藥三沸。）

辨少陰病脉證并治

- 281·少陰之為病，脉微細，但欲寐也。
- 282·少陰病，欲吐不吐，心煩但欲寐，五六日自利而渴者，屬少陰也。虛故引水自救；若小便色白者，少陰病形悉具；小便白者，以下焦虛有寒，不能制水，故令色白也。
- 283·病人脉陰陽俱緊，反汗出者，亡陽也。此屬少陰，法當咽痛而復吐利。
- 284·少陰病，欬而下利、讞語者，被火氣劫故也。小便必難，以強責少陰，汗也。
- 285·少陰病，脉細沈數，病為在裏，不可發汗。
- 286·少陰病，脉微，不可發汗，亡陽故也。陽已虛，尺脉弱澹者，復不可下之。
- 287·少陰病，脉緊，至七八日自下利，脉暴微，手足反溫，脉緊反去者，為欲解也，雖煩、下利，必自愈。
- 288·少陰病，下利，若利自止，惡寒而踡臥，手足溫者，可治。
- 289·少陰病，惡寒而踡，時自煩，欲去衣被者，可治。
- 290·少陰中風，脉陽微陰浮者，為欲愈。
- 291·少陰病欲解時，從子至寅上。
- 292·少陰病，吐、利，手足不逆冷，反發熱者，不死。脉不至者，[至一作足]灸少陰七壯。
- 293·少陰病，八九日，一身手足盡熱者，以熱在膀胱，必便血也。
- 294·少陰病，但厥，無汗，而強發之，必動其血。未知從何道出，或從口鼻，或從目出者，是名下厥上竭，為難治。
- 295·少陰病，惡寒、身踡而利、手足逆冷者，不治。
- 296·少陰病，吐、利、躁煩、四逆者，死。
- 297·少陰病，下利止而頭眩，時時自冒者，死。
- 298·少陰病，四逆、惡寒而身踡、脉不至、不煩而躁者，死。(一作吐利而躁逆者死)
- 299·少陰病六七日，息高者，死。

300·少陰病，脉微細沈、但欲臥、汗出不煩、自欲吐，至五六日自利，復煩躁不得臥寐者，死。

301·少陰病始得之，反發熱，脉沈者，麻黃細辛附子湯主之。方一。

麻黃二兩（去節） 細辛二兩 附子一枚（炮，去皮，破八片）

上三味，以水一斗，先煮麻黃，減二升，去上沫；內諸藥，煮取三升，去滓，溫服一升，日三服。

302·少陰病，得之二三日，麻黃附子甘草湯微發汗。以二三日無證，故微發汗也。方二。

麻黃二兩（去節） 甘草二兩（炙） 附子一枚（炮，去皮，破八片）

上三味，以水七升，先煮麻黃一兩沸，去上沫；內諸藥，煮取三升，去滓，溫服一升，日三服。

303·少陰病，得之二三日以上，心中煩、不得臥，黃連阿膠湯主之。方三。

黃連四兩 黃芩二兩 芍藥二兩 雞子黃二枚 阿膠三兩（一云三挺）

上五味，以水六升，先煮三物，取二升，去滓；內膠烱盡，小冷；內雞子黃，攪令相得。溫服七合，日三服。

304·少陰病，得之一二日，口中和，其背惡寒者，當灸之，附子湯主之。方四。

附子二枚（炮，去皮，破八片） 茯苓三兩 人參二兩 白朮四兩 芍藥三兩

上五味，以水八升。煮取三升，去滓，溫服一升，日三服。

305·少陰病，身體痛，手足寒，骨節痛，脉沈者，附子湯主之。方五。（用前第四方。）

306·少陰病，下利便膿血者，桃花湯主之。方六。

赤石脂一斤（一半全用，一半篩末） 乾薑一兩 粳米一升

上三味，以水七升，煮米令熟，去滓。溫服七合，內赤石脂末方寸匕，日三服。若一服愈，餘勿服。

307·少陰病，二三日至四五日，腹痛，小便不利，下利不止，便膿血者，桃花湯主之。[方]七。（用前第六方。）

308·少陰病，下利便膿血者，可刺。

309·少陰病，吐利，手足逆冷，煩躁欲死者，吳茱萸湯主之。方八。

吳茱萸一升 人參二兩 生薑六兩（切） 大棗十二枚（擘）

上四味，以水七升，煮取二升。去滓，溫服七合，日三服。

310·少陰病，下利、咽痛、胃滿、心煩，豬膚湯主之。方九。

豬膚一斤

上一味，以水一斗，煮取五升，去滓，加白蜜一升，白粉五合，熬香，和令相得，溫，分六服。

311·少陰病二三日，咽痛者，可與甘草湯；不差，與桔梗湯。[方]十。

甘草湯方：

甘草二兩

上一味，以水三升，煮取一升半，去滓，溫服七合，日二服。

桔梗湯方：

桔梗一兩 甘草二兩

上二味，以水三升，煮取一升，去滓，溫分再服。

312·少陰病，咽中傷、生瘡、不能語言、聲不出者。苦酒湯主之。方十一。

半夏十四枚（洗，破如棗核） 雞子一枚（去黃，內上苦酒，著雞子殼中）

上二味，內半夏，著苦酒中，以雞子殼置刀環中，安火上，令三沸，去滓。少少含嚥之；不差，更作三劑。

313·少陰病，咽中痛，半夏散及湯主之。方十二。

半夏（洗） 桂枝（去皮） 甘草（炙）

上三味，等分，各別擣篩已，合治之。白飲和服方寸匕，日三服。若不能散服者，以水一升，煎七沸，內散兩方寸匕，更煮三沸，下火令小冷，少少嚥之。半夏有毒，不當散服。

314·少陰病，下利，白通湯主之，方十三。

蔥白四莖 乾薑一兩 附子一枚（生，去皮，破八片）

上三味，以水三升，煮取一升，去滓，分溫再服。

315·少陰病，下利，脉微者，與白通湯；利不止，厥逆無脉，乾嘔，煩者，白通加豬膽汁湯主之。服湯，脉暴出者死；微續者生。白通加豬膽[汁]湯。方十四。（白通湯，用上方。）

蔥白四莖 乾薑一兩 附子一枚（生，去皮，破八片） 人尿五合 豬膽汁一合

上五味，以水三升，煮取一升，去滓，內膽汁、人尿，和令相得，分溫再服。若無膽，亦可用。

316·少陰病，二三日不已，至四五日，腹痛、小便不利，四肢沈重疼痛，自下利者，此為有水氣。其人或欬，或小便利，或下利，或嘔者，真武湯主之。方十五。

茯苓三兩 芍藥三兩 白朮二兩 生薑三兩（切） 附子一枚（炮，去皮，破八片）

上五味，以水八升，煮取三升，去滓。溫服七合，日三服。若欬者，加五味子半升，細辛一兩，乾薑一兩；若小便利者，去茯苓；若下利者，去芍藥，加乾薑二兩；若嘔者，去附子，加生薑，足前為半斤。

317·少陰病，下利清穀，裏寒外熱，手足厥逆，脉微欲絕，身反不惡寒，其人面色赤；或腹痛，或乾嘔，或咽痛，或利止脉不出者，通脉四逆湯主之。方十六。

甘草二兩（炙） 附子大者一枚（生用，去皮，破八片） 乾薑三兩（強人可四兩）

上三味，以水三升，煮取一升二合，去滓，分溫再服，其脉即出者愈。面色赤者，加蔥九莖；腹中痛者，去蔥，加芍藥二兩；嘔者，加生薑二兩；咽痛者，去芍藥，加桔梗一兩；利止脉不出者，去桔梗，加人參二兩。病皆與方相應者，乃服之。

318·少陰病，四逆，其人或欬、或悸、或小便不利、或腹中痛、或泄利下重者，四逆散主之。方十七。

甘草（炙） 枳實（破，水漬，炙乾） 柴胡 芍藥

上四味，各十分，搗篩，白飲和服方寸匕，日三服。欬者，加五味子、乾薑各五分，并主下利；悸者，加桂枝五分；小便不利者，加茯苓五分；腹中痛者，加附子一枚，炮令坼；泄利下重者，先以水五升，煮薤白三升，煮取三升，去滓，以散三方寸匕，內湯中，煮取一升半，分溫再服。

319·少陰病，下利六七日，欬而嘔、渴，心煩、不得眠者，豬苓湯主之。方十八。

豬苓（去皮） 茯苓 阿膠 澤瀉 滑石各一兩

上五味，以水四升，先煮四物，取二升，去滓，內阿膠烱盡。溫服七合，日三服。

320·少陰病，得之二三日，口燥咽乾者，急下之，宜大承氣湯。方十九。

枳實五枚（炙） 厚朴半斤（去皮，炙） 大黃四兩（酒洗） 芒消三合

上四味，以水一斗，先煮二味，取五升，去滓；內大黃；更煮取二升，去滓；內芒消，更上火，令一兩沸，分溫再服。一服得利，止後服。

321·少陰病，自利清水，色純青，心下必痛，口乾燥者，可下之，宜大承氣湯。[方]二十。（用前第十九方，一法用大柴胡。）

322·少陰病，六七日，腹脹、不大便者，急下之，宜大承氣湯。[方]二十一。（用前第十九方。）

323·少陰病，脈沈者，急溫之，宜四逆湯。方二十二。

甘草二兩（炙） 乾薑一兩半 附子一枚（生用，去皮，破八片）

上三味，以水三升，煮取一升二合，去滓，分溫再服。強人可大附子一枚、乾薑三兩。

324·少陰病，飲食入口則吐；心中溫溫欲吐，復不能吐。始得之，手足寒、脈弦遲者，此胃中實，不可下也，當吐之；若膈上有寒飲，乾嘔者，不可吐也，當溫之，宜四逆湯。[方]二十三。（方依上法。）

325·少陰病，下利，脈微瀋，嘔而汗出，必數更衣，反少者，當溫其上，灸之。（脈經云，灸厥陰可五十壯。）

辨厥陰病脉證并治

- 326·厥陰之為病，消渴，氣上撞心，心中疼熱，飢而不欲食，食則吐蚘，下之利不止。
- 327·厥陰中風，脉微浮為欲愈；不浮為未愈。
- 328·厥陰病欲解時，從丑至卯上。
- 329·厥陰病，渴欲飲水者，少少與之愈。
- 330·諸四逆厥者，不可下之；虛家亦然。
- 331·傷寒先厥後發熱而利者，必自止；見厥復利。
- 332·傷寒，始發熱六日，厥反九日而利。凡厥利者，當不能食；今反能食者，恐為除中，（一云消中）食以索餅。不發熱者，知胃氣尚在，必愈。恐暴熱來出而復去也。後日脉之，其熱續在者，期之旦日夜半愈。所以然者，本發熱六日，厥反九日，復發熱三日，并前六日，亦為九日，與厥相應，故期之旦日夜半愈。後三日脉之，而脉數，其熱不罷者，此為熱氣有餘，必發癰膿也。
- 333·傷寒脉遲六七日，而反與黃芩湯徹其熱。脉遲為寒，今與黃芩湯復除其熱，腹中應冷，當不能食；今反能食，此名除中，必死。
- 334·傷寒，先厥後發熱，下利必自止。而反汗出，咽中痛者，其喉為痹。發熱無汗，而利必自止；若不止，必便膿血。便膿血者，其喉不痹。
- 335·傷寒一二日至四五日厥者，必發熱；前熱者，後必厥。厥深者熱亦深，厥微者熱亦微。厥應下之，而反發汗者，必口傷爛赤。
- 336·傷寒病，厥五日，熱亦五日，設六日當復厥；不厥者自愈。厥終不過五日，以熱五日，故知自愈。
- 337·凡厥者，陰陽氣不相順接，便為厥。厥者，手足逆冷者是也。
- 338·傷寒脉微而厥，至七八日膚冷，其人躁，無暫安時者，此為藏厥，非蚘厥也。蚘厥者，其人當吐蚘。今病者靜，而復時煩者，此為藏寒。蚘上入其膈，故煩，須臾復止；得食而嘔，又煩者，蚘聞食臭出，其人常自吐蚘。蚘厥者，烏梅丸主之。又主久利。方一。

烏梅三百枚 細辛六兩 乾薑十兩 黃連十六兩 當歸四兩 附子六兩（炮，去皮） 蜀椒四兩  
（出汗） 桂枝六兩（去皮） 人參六兩 黃蘗六兩

上十味，異擣篩，合治之。以苦酒漬烏梅一宿，去核，蒸之五斗米下，飯熟擣成泥，和藥令相得。內臼中，與蜜杵二千下，丸如梧桐子大。先食飲服十丸，日三服，稍加至二十九。禁生冷、滑物、臭食等。

339·傷寒熱少微厥，指（一作稍）頭寒，嘿嘿不欲食，煩躁，數日，小便利，色白者，此熱除也，欲得食，其病為愈；若厥而嘔，胃脅煩滿者，其後必便血。

340·病者手足厥冷，言我不結胃，小腹滿，按之痛者，此冷結在膀胱關元也。

341·傷寒發熱四日，厥反三日，復熱四日。厥少熱多者，其病當愈；四日至七日熱不除者，必便膿血。

342·傷寒厥四日，熱反三日，復厥五日，其病為進。寒多熱少，陽氣退，故為進也。

343·傷寒六七日，脉微、手足厥冷、煩躁，灸厥陰。厥不還者，死。

344·傷寒發熱，下利、厥逆、躁不得臥者，死。

345·傷寒發熱，下利至甚，厥不止者，死。

346·傷寒六七日不利，便發熱而利，其人汗出不止者，死，有陰無陽故也。

347·傷寒五六日，不結胃，腹濡，脉虛，復厥者，不可下；此亡血，下之死。

348·發熱而厥，七日下利者，為難治。

349·傷寒脉促，手足厥逆，可灸之。（促，一作縱。）

350·傷寒脉滑而厥者，裏有熱，白虎湯主之。方二。

知母六兩 石膏一斤（碎，綿裹） 甘草二兩（炙） 粳米六合

上四味，以水一斗，煮米熟，湯成去滓，溫服一升，日三服。

351·手足厥寒，脉細欲絕者，當歸四逆湯主之。方三。

當歸三兩 桂枝三兩（去皮） 芍藥三兩 細辛三兩 甘草二兩（炙） 通草二兩 大棗

二十五枚（擘。一法，十二枚）

上七味，以水八升，煮取三升，去滓，溫服一升，日三服。

352·若其人內有久寒者，宜當歸四逆加吳茱萸生薑湯。方四。[397 條序號列本，這 351、352 條合為一條]

當歸三兩 芍藥三兩 甘草二兩（炙） 通草二兩 桂枝三兩（去皮） 細辛三兩 生薑半斤（切） 吳茱萸二升 大棗二十五枚（擘）

上九味，以水六升，清酒六升和，煮取五升，去滓，溫分五服。（一方，水酒各四升。）

353·大汗出，熱不去，內拘急，四肢疼，又下利厥逆而惡寒者，四逆湯主之。方五。

甘草二兩（炙） 乾薑一兩半 附子一枚（生用，去皮，破八片）

上三味，以水三升，煮取一升二合，去滓，分溫再服。若強人，可用大附子一枚，乾薑三兩。

354·大汗，若大下利而厥冷者，四逆湯主之。方六。（用前第五方。）

355·病人手足厥冷，脈乍緊者，邪結在胃中，心下滿而煩，飢不能食者，病在胃中，當須吐之，宜瓜蒂散。方七。

瓜蒂 赤小豆

上二味，各等分，異擣篩，合內臼中，更治之。別以香豉一合，用熱湯七合，煮作稀糜；去滓，取汁和散一錢匕，溫頓服之。不吐者，少少加，得快吐乃止；諸亡血、虛家，不可與瓜蒂散。

356·傷寒厥而心下悸，宜先治水，當服茯苓甘草湯，却治其厥，不爾，水漬入胃，必作利也。茯苓甘草湯。方八。

茯苓二兩 甘草一兩（炙） 生薑三兩（切） 桂枝二兩（去皮）

上四味，以水四升，煮取二升，去滓，分溫三服。

357·傷寒六七日，大下後，寸脈沈而遲，手足厥逆，下部脈不至，喉咽不利，唾膿血，泄利不止者，為難治。麻黃升麻湯主之。方九。

麻黃二兩半（去節） 升麻一兩一分 當歸一兩一分 知母十八銖 黃芩十八銖 萎蕤十八銖

(一作菖蒲) 芍藥六銖 天門冬六銖(去心) 桂枝六銖(去皮) 茯苓六銖 甘草六銖

(炙) 石膏六銖(碎，綿裹) 白朮六銖 乾薑六銖

上十四味，以水一斗，先煮麻黃一兩沸，去上沫，內諸藥，煮取三升，去滓，分溫三服。相去如炊三斗米頃，令盡，汗出愈。

358·傷寒四五日，腹中痛，若轉氣下趣少腹者。此欲自利也。

359·傷寒本自寒下，醫復吐下之，寒格，更逆吐下；若食入口即吐，乾薑黃芩黃連人參湯主之。方十。

乾薑 黃芩 黃連 人參各三兩

上四味，以水六升，煮取二升，去滓，分溫再服。

360·下利有微熱而渴，脈弱者，今自愈。

361·下利脈數，有微熱汗出，今自愈；設復緊，為未解。(一云設脈浮復緊)

362·下利、手足厥冷、無脈者，灸之不溫，若脈不還，反微喘者，死；少陰負趺陽者，為順也。

363·下利，寸脈反浮數，尺中自濇者，必清膿血。

364·下利清穀，不可攻表；汗出必脹滿。

365·下利，脈沈弦者，下重也；脈大者，為未止；脈微弱數者，為欲自止，雖發熱不死。

366·下利脈沈而遲，其人面少赤、身有微熱、下利清穀者，必鬱冒汗出而解，病人必微厥，所以然者，其面戴陽，下虛故也。

367·下利脈數而渴者，今自愈；設不差，必清膿血，以有熱故也。

368·下利後，脈絕，手足厥冷，晷時脈還，手足溫者生；脈不還者死。

369·傷寒下利日十餘行，脈反實者，死。

370·下利清穀，裏寒外熱，汗出而厥者，通脈四逆湯主之。方十一。

甘草二兩(炙) 附子大者一枚(生，去皮，破八片) 乾薑三兩(強人可四兩)

上三味，以水三升，煮取一升二合，去滓，分溫再服，其脈即出者愈。

371·熱利下重者，白頭翁湯主之。方十二。

白頭翁二兩 黃蘗三兩 黃連三兩 秦皮三兩

上四味，以水七升，煮取二升，去滓，溫服一升；不愈，更服一升。

372·下利腹脹滿，身體疼痛者，先溫其裏，乃攻其表；溫裏宜四逆湯，攻表宜桂枝湯。[方]十三。

（四逆湯用前第五方。）

桂枝湯方：

桂枝三兩（去皮） 芍藥三兩 甘草二兩（炙） 生薑三兩（切） 大棗十二枚（擘）

上五味，以水七升，煮取三升，去滓，溫服一升；須臾啜熱稀粥一升，以助藥力。

373·下利欲飲水者，以有熱故也，白頭翁湯主之。[方]十四。（用前第十二方。）

374·下利膿語者，有燥屎也，宜小承氣湯。方十五。

大黃四兩（酒洗） 枳實三枚（炙） 厚朴二兩（去皮，炙）

上三味，以水四升，煮取一升二合，去滓，分二服。初一服膿語止，若更衣者，停後服；不爾，盡服之。

375·下利後更煩，按之心下濡者，為虛煩也，宜梔子豉湯。方十六。

肥梔子十四箇（擘） 香豉四合（綿裹）

上二味，以水四升，先煮梔子，取二升半；內豉，更煮取一升半，去滓，分再服。一服得吐，止後服。

376·嘔家有癰膿者，不可治嘔；膿盡自愈。

377·嘔而脈弱，小便復利，身有微熱，見厥者，難治，四逆湯主之。[方]十七。（用前第五方。）

378·乾嘔吐涎沫，頭痛者，吳茱萸湯主之。方十八。

吳茱萸一升（湯洗七遍） 人參三兩 大棗十二枚（擘） 生薑六兩（切）

上四味，以水七升，煮取二升，去滓，溫服七合，日三服。

379·嘔而發熱者，小柴胡湯主之。方十九。

柴胡八兩 黃芩三兩 人參三兩 甘草三兩（炙） 生薑三兩（切） 半夏半升（洗）

大棗十二枚（擘）

上七味，以水一斗二升，煮取六升，去滓，更煎取三升，溫服一升，日三服。

380·傷寒，大吐、大下之，極虛，復極汗者，其人外氣怫鬱，復與之水以發其汗，因得嘔。所以然者，胃中寒冷故也。

381·傷寒嘔而腹滿，視其前後，知何部不利，利之即愈。

## 辨霍亂病脉證并治

382·問曰：病有霍亂者何？答曰：嘔吐而利，此名霍亂。

383·問曰：病發熱、頭痛、身疼、惡寒、吐利者，此屬何病，答曰：此名霍亂。霍亂自吐下，又利止，復更發熱也。

384·傷寒，其脉微瀋者，本是霍亂，今是傷寒，却四五日，至陰經上，轉入陰必利。本嘔下利者，不可治也；欲似大便，而反失氣，仍不利者，此屬陽明也，便必鞭，十三日愈，所以然者，經盡故也。下利後，當便鞭，鞭則能食者愈。今反不能食，到後經中，頗能食，復過一經能食，過之一日當愈；不愈者，不屬陽明也。

385·惡寒、脉微[一作緩]而復利，利止，亡血也，四逆加人參湯主之。方一。

甘草二兩（炙） 附子一枚（生，去皮，破八片） 乾薑一兩半 人參一兩

上四味，以水三升，煮取一升二合，去滓，分溫再服。

386·霍亂，頭痛、發熱、身疼痛、熱多欲飲水者，五苓散主之；寒多不用水者，理中丸主之。方二。

五苓散方：

豬苓（去皮） 白朮 茯苓各十八銖 桂枝半兩（去皮） 澤瀉一兩六銖

上五味，為散，更治之，白飲和服方寸匕，日三服。多飲煖水，汗出愈。

理中丸方：（下有作湯加減法。）

人參 乾薑 甘草（炙） 白朮各三兩

上四味，搗篩，蜜和為丸，如雞子黃許大。以沸湯數合，和一丸，研碎，溫服之，日三四、夜二服；腹中未熱，益至三四丸，然不及湯。湯法：以四物依兩數切，用水八升，煮取三升，去滓，溫服一升，日三服。若臍上築者，腎氣動也，去朮加桂四兩；吐多者，去朮加生薑三兩；下多者還用朮；悸者，加茯苓二兩；渴欲得水者，加朮，足前成四兩半；腹中痛者，加人參，足前成四兩半；寒者，加乾薑，足前成四兩半；腹滿者，去朮，加附子一枚。服湯後，如食頃，飲熱粥一升許，微

自溫，勿發揭衣被。

387·吐利止而身痛不休者，當消息和解其外，宜桂枝湯小和之。方三。

桂枝三兩（去皮） 芍藥三兩 生薑三兩 甘草二兩（炙） 大棗十二枚（擘）

上五味，以水七升，煮取三升，去滓，溫服一升。

388·吐利汗出，發熱惡寒，四肢拘急，手足厥冷者，四逆湯主之。方四。

甘草二兩（炙） 乾薑一兩半 附子一枚（生，去皮，破八片）

上三味，以水三升，煮取一升二合，去滓，分溫再服。強人可大附子一枚、乾薑三兩。

389·既吐且利，小便復利而大汗出，下利清穀，內寒外熱，脈微欲絕者，四逆湯主之。方五。（用前第四方。）

390·吐已下斷，汗出而厥，四肢拘急不解，脈微欲絕者，通脈四逆加豬膽[汁]湯主之。方六。

甘草二兩（炙） 乾薑三兩（強人可四兩） 附子大者一枚（生，去皮，破八片） 豬膽汁半合

上四味，以水三升，煮取一升二合，去滓；內豬膽汁，分溫再服，其脈即來。無豬膽，以羊膽代之。

391·吐、利、發汗，脈平，小煩者，以新虛不勝穀氣故也。

辨陰陽易差後勞復病脉證并治

392·傷寒陰陽易之為病，其人身體重、少氣、少腹裏急，或引陰中拘攣，熱上衝胃，頭重不欲舉，眼中生花，（花一作眇）膝脛拘急者，燒禪散主之。方一。

婦人中禪，近隱處，取燒作灰。

上一味，水服方寸匕，日三服，小便即利，陰頭微腫，此為愈矣。婦人病取男子禪燒服。

393·大病差後勞復者，枳實梔子豉湯主之。方二。

枳實三枚（炙） 梔子十四箇（擘） 豉一升（綿裹）

上三味，以清漿水七升，空煮取四升；內枳實、梔子，煮取二升；下豉，更煮五六沸，去滓，溫分再服，覆令微似汗。若有宿食者，內大黃如博碁子五六枚，服之愈。

394·傷寒差以後更發熱，小柴胡湯主之；脉浮者，以汗解之；脉沈實（一作緊）者，以下解之。方三。

柴胡八兩 人參二兩 黃芩二兩 甘草二兩（炙） 生薑二兩 半夏半升（洗） 大棗十二枚（擘）

上七味，以水一斗二升，煮取六升，去滓；再煎取三升。溫服一升，日三服。

395·大病差後，從腰以下有水氣者，牡蠣澤瀉散主之。方四。

牡蠣（熬）澤瀉 蜀漆（煖水洗去腥） 葶藶子（熬） 商陸根（熬） 海藻（洗去鹹[鹹]） 栝樓根（各等分）

上七味，異擣，下篩為散；更於白中治之，白飲和服方寸匕，日三服。小便利，止後服。

396·大病差後，喜唾，久不了了，胃上有寒，當以丸藥溫之，宜理中丸。方五。

人參 白朮 甘草（炙） 乾薑各三兩

上四味，擣篩，蜜和為丸，如雞子黃許大，以沸湯數合，和一丸，研碎，溫服之，日三服。

397·傷寒解後，虛羸少氣，氣逆欲吐，竹葉石膏湯主之。方六。

竹葉二把 石膏一斤 半夏半升（洗） 麥門冬一升（去心） 人參二兩 甘草二兩

(炙) 粳米半升

上七味，以水一斗，煮取六升，去滓；內粳米，煮米熟，湯成去米，溫服一升，日三服。

398·病人脉已解，而日暮微煩。以病新差，人強與穀，脾胃氣尚弱，不能消穀，故令微煩；損穀則愈。

電子版檔案經過李宇銘博士校訂，參考原文《仲景全書》影印版：

漢·張仲景述；晉·王叔和撰次；宋·林億校正；明·趙開美校刻；沈琳全校。

中醫古籍出版社《中醫珍本叢書》系列，據明萬曆二十七年（1599年）己亥趙開美翻刻宋版影印。

中醫古籍出版社，1997年6月第一版 ISBN 7-80013-675-2/R·671

備註：

1. 原文為「右X味」，今全改為「上X味」
2. [ ]小括號內的字，為原文中沒有，但應該要增補該字；或者原文錯字需要更正；或為補註。
3. 因為不少原文文字與現在的不同，以下附上一個古字與現代字比較表，方便閱讀：

古字	現代字	古字	現代字
歠(一次)	啜	支(部分)	肢體
煮	煮	脉	脈
消	消	漚	漚
擣	搗	荅	答
煖水	暖水	嚥(一次)	咽
欬	咳	寫(一次)	瀉
胃	胸	差	瘥
糧	糧	茵陳	茵陳
沈	沉	畜	蓄
鞭	硬	解(部分)	解
栝樓	栝萇	穀	谷(部分)
藏府(部分不同)	臟腑	協(部分)	協
鬲(一次)	膈	藥	柏
却	卻	虻	蛔
碁	棋	葳蕤	葳蕤
飢	飢	鹹	鹹
蟲	虻 (蟲)		

4. 其他寫法稍為不同的字：(需參考原書比較)

與、熱(部分)、喉、甘、虛、身、銳、莢、與、關、潦、陰、脂、卯、歸、喉、眇、脾、傲。

【更多李宇銘博士學術觀點，請參閱李博士個人網站：<http://leeyuming.com/>】